

太原府志

册五十

太原府志卷三十六

人物三

金

郭文振字拯之太原人承安二年進士累官遼州刺史充宣差從宜都提控治遼深得衆心興定三年遙授中都副留守權元帥左都監行河東北路元帥府事招降太原東山二百餘村遷老幼於山寨得壯士七十分駐營柵防護秋穫四年請升樂平縣爲臯州壽陽縣西張寨爲晉州從之封晉陽公河東北路皆隸焉奏調協孟州提控伯德安事遣近臣慰諭又奏武仙所統境土甚大雖與林州元帥府共招撫之乞更選本土州縣官重其職任同與安集可使還定宣宗用其策又薦葭州刺史

太原府志

卷三十六

人物

一

古里甲蒲察行嵐管等州元帥府事從之元光元年惟良得罪召還奏惟良在林州政尙寬厚大得民心今茲被召軍民遮路泣留乞遣還林州爲便不許又上書乞遣前平章政事胥鼎行省河北諸公府帥府並聽節制詔諭百姓使知不忘遺黎之意然後并力恢復不報復奏河朔百姓引領南望臣再四請於樞府但以會合府兵爲言公府雖號分封力實單弱且不相統攝所在被兵朝廷不卽遣兵復河北人心將以爲舉河朔而棄之甚非計也朝廷不能用

趙益太原人讀書肄業元兵入鳩合土豪保聚山峽屢戰有功晉陽公郭文振駐兵榆次重原寨遂率衆收復太原夜登城斬馘甚衆獲老幼二萬餘口馬仗不可計授

太原治中復擢同知府事兼招撫使元光元年八月元兵攻城甚急知不可支乃焚府庫殺妻子沉符印於井遂自殺贈銀青榮祿大夫河東北路宣撫使仍求其子孫

段德祥陽曲人慈祥樂易遇事果敢金主聞其賢召至奇其狀貌授定襄縣主簿兼本縣尉

劉海興州人舉進士第一人仕至河南府尹死於國難子孫遂家河南焉

元

郝拔都太原人善騎射通譯語太祖遣使宋往返數四以辨稱從侵宋以功拜宣德等五路萬戶後還治太原凡遠道租稅過重者悉除之卒追封冀國公子天益天舉

太原府志

卷三十六

人物

二

天澤皆至總管

張德輝字耀卿冀寧交城人少力學數舉於鄉及北渡史

天澤辟經歷官從南征時軍士逃者必戮德輝言太過

止配令穴城光州下葦山民結寨德輝曰鄉民爲自保

計當曉以禍福果相繼來降世祖在潛邸召見問曰孔

子歿已久今其性安在對曰聖人與天地終始無往不

在殿下能行聖人之道性卽在是矣又問或云遼以釋

廢金以儒亡有諸對曰遼事臣未敢知金季乃所親睹

宰執皆武弁世爵間用一二儒臣及論軍國大計又不

使預聞大抵以儒進者三十之一然則金之淪亡自有

任其咎者儒何與焉又問祖宗法度德輝指銀槃喻曰

當求謹厚者司掌乃永爲寶用又問農家對曰農桑天

下之本衣食所從出今男耕女織終歲勤苦而親民之吏復橫歛以盡之則民鮮有不凍餒者矣問孔子廟食禮對曰尊崇與否於聖人無所損益特以見時君崇儒重道之意耳又問典兵宰民對曰莫如更遣宗室之賢如口溫不花者使掌兵權勲舊如忽都虎者使主民政則天下均受賜矣及將還又陳先務七事曰敦孝友擇人才察下情貴兼聽親君子信賞罰節用度切直多所開悟尋與元裕北覲請世祖爲儒教大宗師世祖悅受之因啟累朝有旨蠲儒戶兵賦卽令行之仍命提調正定學校世祖初命宣撫河東擊豪強黜賊吏均賦役者耆不遠千里來謁曰六十年不復見此太平官府矣河東徭役官吏率賦一征十乃閱實戶編均其等第出納

有法汾晉地廣官司守吏結爲朋黨得姦贓尤甚者數十人械庭下數其罪惡杖黜之所部肅然考績爲十路最陞見命疏所急務條四事曰嚴保舉以取人材給俸祿以養廉吏易世官而遷都邑正刑罰而勿屢赦帝嘉納焉遷東平路宣慰使奏免遠輸豆粟二十萬斛同知寶合丁議官賦蠶絲令民稅而後輸德輝曰是誣上以毒下也且輸納後期之責孰任之遂罷其事至元三年召叅議中書省事五年擢侍御史辭請老命舉任風憲者疏烏古倫眞張邦彥徒單公履張家張肅李槃張昉曹椿年西方賓周止高逸民王博文劉郁孫汝楫王暉胡祇通周砥李謙魏初鄭辰凡二十人德輝剛直博學有經濟器性不喜嬉笑與元裕李冶游封龍山時人號

爲龍山三老卒年八十

怯烈西域人世居太原由中書驛史從賽典赤爲雲南行省幕官諸洞欵附嘗頒詔於緬緬王稽顙仕至資善大夫雲南行中書省左丞大德四年卒

郝佑字君輔小字朶魯別台由宿衛補官仁宗時拜殿中侍御史以廉直著名被知遇遷陝西行省叅知政事拜陝西行御史臺侍御史子忠恕詳文苑

王守誠陽曲人泰定初進士由秘書郎累官禮部尙書與修三史至正間使四川薦賢直枉爲諸道最進行省左丞卒諡文昭所著有文集

劉濬字濟川興州人金狀元海曾孫由廉訪司書吏調連江縣寧善鄉巡檢至正十三年江西賊帥王善寇閩官太原府志

卷三十六

人物

四

軍守羅源縣與連江接壤濬妻正定史氏有才識謂濬曰事急矣可聚兵以捍一方於是盡出奩中物募壯士百餘命仲子健將之浹旬間衆至數萬賊尋破羅源分兩道攻福州濬拒之辰山三戰三捷俄福州陷衆多潰濬獨率健兵進遇賊於中麻突其陣斬前鋒五人賊兵大至鏖戰三時頃濬中箭墮馬健下馬掖之胥被獲濬戟手大罵賊縛濬塔下先斫手一指罵彌厲再斫一指亦如之指且盡斫兩腕次及兩足濬色不少變罵聲猶不絕遂割其喉舌而死健亦以死拒賊善義之舍健使殮濬屍健歸請兵於帥以復讐弗聽健盡散家貲結死士百人詐爲工商流丐入賊中夜半發火大譟賊驚擾自相屠戮健手斬殺父者張破四弁擒善及寇首陳伯

祥來獻磔之贈濬福建行省檢校官授健古田縣尹官
爲濬立祠福州北門外歲時致祭

馮純陽曲人舉進士爲河南行省平章後封魏國公子思
溫累官彰德路總管後封晉國公思溫子本翰林檢討
皆能世其家云

馮恩陽曲人通經籍敦行誼蒞官廉明善理冤抑累官御
史中丞集賢院大學士

郭周岢嵐人官義勇軍萬戶遇歲饑發廩賑貸多所全活
超授本州防禦使賜金牌充宣差提控再進鎮國上將
軍鎮遠節度使兼嵐州管內觀察使河東北路關外六
州都元帥

武祺太谷人以儒進歷知安慶路桐城縣事發奸摘伏果
太原府志

卷三十六

人物

五

斷如神淮西廉訪司與安慶路交章舉荐歷省部臺二
十餘年官至甘肅行省參政妻王氏罵寇死節

杜克溫太谷人上都巡警院使有没入男女奏許令配偶
有古杜母之謠歷官銅鐵冶提舉使

武簡如太谷人性寬厚任大理評事議獄多仁恕終開州
刺史

高福太谷人龍虎衛上將軍有戰功

侯洪字有容太原人舉進士初爲離石判官進尹榆次廉
直無私遇事立決雖簿書纖悉不遺

明

郝鵬徐溝人洪武中以貢授戶部檢校游歷湖廣參政入
爲戶部右侍郎晉南京戶部尙書性儉樸官卿貳猶衣

大布衣所居廳事亦前爲諸生所處也恭謹自飭言動不苟中外皆有能聲當世羣以公輔推之

范斌榆次人永樂甲午解元知陝西華州性仁恕撫字得宜不畏強禦有犯必懲後以憂去民赴闕保畱加叅議俸復知華州卒於官

張旗榆次人永樂時知安邱縣會妖賊唐賽兒等攻安邱旗與縣丞馬撝率民兵八百以死拒戰賊敗復集衆攻城會衛青兵至旗出城中兵合擊大敗之卒全安邱事聞擢山東叅政

周瑄字廷玉陽曲人由宣德乙卯鄉舉入國學正統中除刑部主事善治獄北征當扈從者多托疾瑄請行遂被劄歸擢署郎中校尉受賕縱盜以仇人代瑄辨雪之抵

太原府志

卷三十六

人物

六

校尉罪外郡送囚一日至八百人瑄慮其觸熱三日決遣殆盡景泰元年以尙書王直薦超拜刑部右侍郎賑順天河間饑英宗復辟遍歷所部大舉荒政先後賑饑民二十六萬五千給牛種各萬餘奏行利民八事還朝轉左門達達臬數興大獄瑄委曲開諭多所救正復飭諸郎毋避禍以故不至冤濫官刑部久屬吏不敢欺成化改元遷右都御史督理南京糧儲捕懲作奸者數輩宿弊爲清言鳳陽淮徐饑獲發廩四十萬以賑久之遷南京刑部尙書令事不須勘者毋出五日獄無滯囚暑疫悉遣輕繫者曰召汝則至囚歡呼去無失期爲尙書九載屢乞休久乃得請家無田園卜居南京卒贈太子少保諡莊懿長子經次子紘成化進士爲南京吏科給

事中兩以災異言事並嘉納閱軍爲中官蔣琮誣奏貶南京光祿署丞終山東叅議

王永壽字延齡太原人正統間以舉人任饒州府推官擢廣西道監察御史嘗從北征凱還受賚巡按山東貴州蘇松等處累升工部尙書巡撫湖廣兼督軍務征銅鼓五關等苗有功賜從一品俸天順初謫南京卒於官賜葬祭

古鏞祁縣人正統丙辰進士選翰林院庶吉士授大理寺評事出爲山東僉事治河張秋遷本省按察使名補大理寺卿鏞深經術有幹濟材初官東觀以文章有名後涖臬司晉廷評平反冤獄比張秋之功尤鉅先是河決時患且及京師鏞至相其形勢而疏鑿之不數月遂就

太原府志

卷三十六 人物

七

故道今卽其地立祠祀焉

王福字崇善清源人幼穎異喜讀書正統戊午舉鄉試第一入國學祭酒李時勉深器重之乙丑成進士授監察御史照刷陝西三司文券遷順天府府丞轉府尹以幹濟稱值內艱遣官諭祭營葬事甫畢卽奪情復任力辭不獲在京兆十餘年彈治姦猾嘗自爲贊當世謂爲實錄焉

江洪字朝宗其先合肥人祖浩爲太原左衛指揮僉事子孫世襲因家焉洪少以才勇知名善騎射能任人舉士卒同甘苦宣德末選總京營左翼升署都指揮僉事仍守山西英宗十四年也先犯邊上率六師親征失利洪奮勇護乘輿與其弟子四人並死之

魏恭亦交城人景泰庚午舉人授陝西渭南知縣調河南新安女有爭訟者屢歲不決恭至一訊卽服獲盜乃自責曰此吾不能以德化民致然耳他盜聞之皆改行爲善都御史王恕荐於朝升西安府通判改荊州府

王璟陽曲人景泰癸酉舉人授濟南府同知擢本府知府遷本省布政司叅政轉南京光祿寺卿璟事父母孝所得俸輒推以予昆弟居官所至俱有惠政在南都清望尤著卒贈工部侍郎

申綱陽曲人工詩文景泰癸酉舉人選監察御史有直聲出按河間等處奸貪屏迹歷知松江九江兩府家無厚產有故屬劉宇嘗餽以金峻却之後宇爲冢宰寓書臺使者月餽錢米却不受

太原府志

卷三十六 人物

八

孫榮榆次人博學工詩貧不能具饘粥處之裕如景泰癸酉舉人授華州訓導尋遷麟遊縣教諭恒以祿不逮親爲歉終身不御酒肉居官時凡四陳時政得失疏累萬餘言幾蹈禍不悔

王鑑字彥昭太原人景泰甲戌進士授御史嘗於左順門面斥中官非禮中官怒甚屬都御史蕭維楨因考察去之維楨不從天順時彗星見鑑與同官十三人將劾石亨曹吉祥給事中王鉉洩於亨亨先與吉祥泣訴上言鑑等結黨排陷明日疏入收疏首張鵬楊瑄悉名諸御史擲彈章俾自讀訖下獄榜掠遣戍會風雷雹災甚乃止貶膚施知縣有善政憲宗初所司以治行聞擢延安知府陝西守臣亦上鑑膚施政績特賜勅褒之

任義字時中榆次人博通經史尤精於易天順己卯舉人任南陽同知剗剔蠹政殆盡上清軍便宜五事著兵部條例中汝鄧饑先度地爲屋發粟以賑民至如歸以不附權貴歸講學授徒自號五雲人稱五雲先生
郝毅榆次人天順己卯舉人授鞏昌府通判剖斷如流勸勵學校以剛正忤時歸屏居別墅五十年不涉城市躬課耕桑自給年逾九十卒

周經字伯常瑄子天順四年進士改庶吉士授檢討成化中歷侍讀中允侍東宮講文華大訓太子起立拱聽閣臣議坐經與諸講官皆不可乃已孝宗立進太常少卿兼侍讀宏治二年擢禮部右侍郎中官請修黃村尼寺奉祀孝穆太后吐魯番貢獅子不由甘肅假道滿刺加

太原府志

卷三十六

人物

九

浮海至廣東經皆倡僚長爭毀其寺却貢不與通調吏部尋進左侍郎通政經歷沈祿張后姑壻也中官傳旨擢本司叅議經言非面承旨又無御札不敢奉詔時尙書王恕在告經與共疏爭之朝論避焉靈壽奸民獻地於中官李廣經倡九卿疏爭卒罪獻地者八年災異陳時政具奏草中言斥戲樂密令中官廉草奏者尙書耿裕曰疏首吏部裕實具草經曰疏草出經手卽有罪罪經世兩賢之九年代葉淇爲戶部尙書寬逋緩征裁節冗濫四方告災必覆奏蠲除每委官監稅課入多者與下考奉御趙瑄獻雄縣地爲東宮莊經劾瑄違制下獄鎮撫司請勘實經復爭之乃予民中官何鼎劾外戚張鶴齡下獄經疏救之忤旨切責雍王祐標乞衡州稅課

司及衡陽縣河泊所經言不可許納之織造中官請增給兩浙鹽課二萬引經言鹽筴佐邊不宜濫給不從經恐歲以爲常再疏請斷其後乃命歲予五千引倉場監督內官多增遣經力爭詔止設總督二人京通監督二人內靈臺請撥錦衣餘丁百人經曰祖宗設內臺其地至密今一旦增百人將來必有洩漏妄言者上悟立已之崇王見澤乞河南退灘地二十餘里經言不宜予與王祐杭乞近湖地千三百餘頃經三疏爭之竟不許時賜壽寧侯張鶴齡肅寧諸縣地四百餘頃其家人因侵民地三倍鶴齡又奏莊田加徵銀二分經抗章執奏命覆核經言地已再勘今復遣使徒滋紛擾昔太祖以劉基故減青田賦徵米五合欲使基鄉里子孫世世頌基

今與濟篤生皇后作配聖躬正宜卹民減賦俾世世戴德何乃使小民銜怨無已也勘官言地乃憲廟皇親栢權及民恒產經復諫曰東宮親王莊田徵稅自有例而鶴齡獨踰之天下謂陛下惟厚外戚不恤赤子權先帝妃家亦戚畹也名雖僨直實乃奪之天下又謂陛下惟厚椒房不念先帝世尤躓焉給事中魯昂請盡括稅役金錢輸大倉經曰不節織造賞賚齋醮土木之費乃欲括天下財給事言非是內官傳旨索燈費二萬兩持不與經剛介方正好強諫雖重忤旨不恤宦官貴戚皆憚而疾之會星變自陳乞休命賜勅馳驛歸加太子太保廷臣爭乞畱中外論薦至八十餘疏武宗初言官復薦名爲南京戶部尙書遭繼母憂三年召爲禮部尙書固

辭不許遣官卽其家起之至郊外復以疾辭上遣使慰問賚玉帶強起受事數月卽謝病去五年卒年七十一贈太保諡文端子會進士浙江右叅政

王永亨太原人受學薛瑄門後任隆慶知州著有宦績子瓊邃於理學爲世名臣蓋淵源有自云

王瑞陽曲人成化戊子舉人知丹陽丁父憂改獻縣任丹陽時有權勢豪橫置於法抵死獻縣有外戚奪民田以計還之豪右斂迹

張縉字朝用陽曲人成化己丑進士授鈞州知州補滄州遷南京工部郎中出爲杭州府知府節縮浮費省民錢十餘萬遷山東叅政都御史劉大夏治河張秋委令調度河左右悉被其利築南望東堤令運卒得於水漲時

太原府志

卷三十六

人物

十一

分道並挽晉通政司右通政尋擢右僉都御史巡撫眞保二府轉右副都御史巡撫宣大胥有保障績改督漕運值歲荒奏畱米十萬石賑饑人入爲戶部左侍郎晉南京戶部尙書以不附逆瑾致仕旋復與尙書韓文同下詔獄又以前奏請改兌爲擅更祖制除名瑾誅起補都御史督漕如故兼勦淮南盜奏捷賜璽書褒勞已而力請致仕得旨晉南京戶部尙書歲給夫米如故縉起州郡洊歷臺省在滄州將去任民攀臥泣畱繼以入議經其地歡呼迎馬首者絡繹不絕後因家焉卒年八十三著有玉雪遺稿及奏議若干卷

陳琦字文玉清源人成化辛卯舉人

縣志載景泰丙子舉人

初判華

州斷理稱明時北兵逼西夏撫臣以琦有文武材畧選

西鳳等府民兵千人屬之遂截殺韋州拒戰紅德城擐甲胄者七日追獲人畜萬計升知安化縣再補邯鄲皆有德政云

陳璧字瑞卿陽曲人成化壬辰進士知嘉興武邑二縣以強項著擢監察御史出按山東辨太保劉珣獄轉山東副使備兵臨清爲漕運地奸弊叢生璧至裁省殆盡遷本省按察使有倚法爲奸者立治之遷南京太僕寺卿清操皜然建栖雲環山二樓攜佳客諷詠竟日有康樂香山遺風三年擢右副都御史整飭薊州邊務兼撫順永三府未幾以病告歸璧性抗直居家孝友重行誼爲御史時偶觸兄怒長跪謝過爲副史有僉事某舊與隙比卒傾囊賻之後膺節鉞遽賦遂初急流勇退其風節

太原府志

卷三十六

人物

七

尤足尙云

杜綦陽曲人成化庚子舉人授城固令升南京戶部主事時逆瑾勢傾中外凡晉秩者率厚遺謁謝綦獨不行僅數月卽奪其官瑾誅起擢員外郎言行政事多可法以年老乞歸

唐希介字景賢陽曲人成化丁未進士選庶吉士改工科給事中命稽省真定等四鎮儲備盡得宿弊以聞權倖見嫉謫四川石砭宣撫司經歷稍遷漢陰令繕修城郭庶務畢興遷知通州靖漁鹽盜修河堤民用安堵擢陝西按察司僉事督餉榆林時大學士楊一清總制邊務議增茶市以贍軍賦希介條荅便宜二十三事一清并施行之且貽書以謝改四川僉事尋擢陝西按察司副

使愛養士卒約束裨校邊境肅然軍府多贏積中官欲私取希介不可中官構諸逆瑾瑾矯詔著致政歸年八十五卒

王瓊字德華太原人成化二十年進士授工部主事晉郎中出治漕河三年著爲志繼者按之不爽毫髮由是以敏練稱改戶部歷河南右布政使正德元年擢右副都御史治鹽兩淮入爲戶部右侍郎按衙府賜地三年轉吏部右侍郎改南京版闕補戶部右侍郎轉左八年晉尙書瓊爲人有心計爲郎時悉錄故牘條例盡得其歛散盈縮狀及爲尙書益明習國計邊帥請芻糗則屈指計某倉場馬糧草幾何諸郡歲輸邊卒歲採秋青幾何曰足矣重索妄也人益以瓊爲才十年轉兵部尙書累

太原府志

卷三十六 人物

三

加少師兼太子太師十四年宸濠反瓊請勅南和伯壽祥督操江兵防南都南贛巡撫王守仁湖廣巡撫秦金各率所部趨南昌應天巡撫李充嗣鎮京口淮揚巡撫叢蘭扼儀真而上下詔親征命與楊廷和等居守先是瓊用王守仁撫南贛假便宜提督軍務至是舉朝惴惴瓊治兵自如大言曰諸君勿憂吾用王伯安贛州正爲今日不過旦夕賊成擒耳果如其言尋代陸完爲吏部尙書無何世宗入繼言官交劾瓊繫獄戍莊浪改綏德霍韜首薦瓊嘉靖六年令還籍明年復命爲兵部尙書兼右都御史代王憲督陝西三邊軍務土魯番將牙木蘭沙州番帖木哥土巴胥求內附詔瓊趨肅州議之賊獻還哈密求通貢乞歸羈畱使臣瓊奏乞撫納兵部尙

書玉時中議從之瓊復上番寇肅州狀并言賊方悔禍
宜俯納其請再疏力請詔還番使通貢如故自是西域
復定而北兵侵莊浪瓊部諸將遮擊之斬數十級敵退
俄入紅城子明年侵寧夏又侵靈州瓊督遊擊梁震等
邀斬七十餘人秋集諸道精卒三萬按行塞下自寧夏
抵花馬池旌旗三百餘里不絕敵聞之徙帳遠遁諸軍
分道出縱野燒耀兵而還會給事邱九仞劉世揚御史
吳仲等劾瓊令致仕俄寢前詔遣使慰諭之時番大掠
臨洮瓊集兵曉以禍福諸番多順命惟若籠板爾諸族
不服乃討焚其巢斬首二百六十撫降七十餘族錄功
加太子太保瓊在邊戎備甚飭敵嘗入山西得利踰歲
復獵境上陽欲東瓊令備其西敵果入大敗之敵益懼

太原府志

卷三十六

人物

古

而土魯番率十國奉貢及是諸番蕩平西陲益靖十年
冬召入爲吏部尙書十一年秋卒官贈太師諡恭襄瓊
在本兵時功多而其督三邊也人以比楊一清云

郭曦字景暘榆次人成化丙午舉人授新蔡令歲稔貯粟
萬餘石賑活甚衆時流賊屠掠郡縣率民兵禦之城賴
以安秩滿民保畱仍任一年加升承直郎開州同知尋
擢河南通判

張璣文水人成化間舉人知洛南縣廉恕公勤愛民如子
秩滿百姓赴京保畱加六品俸仍知縣事聲名甲於關
西後貧不能歸里卽邑居焉

金鼎字大器榆次人篤實寬裕喜怒不見於色任道力行
常若不及成化間貢任武功訓導義貌偉容博學善教

以義理約束諸生諸生毋敢違者所著有松軒集

張梯岢嵐人成化間貢知陝西中部縣嚴慈互濟任九載終始如一歲大歉人相食賑救有方盜賊屏息升寧州知州民皆號泣不忍去

崔侃陽曲人宏治庚戌進士歷官保寧知府操守廉明政績大著府有疑獄悉得其情時流賊肆掠侃忤逆瑾得請歸田卽引衆避遁一方賴免林居三十餘年藿粥自甘杜門不出

羅賢字大用清源人宏治庚戌進士試福建道御史踰年當實授聞親訃卽日就道服闋補原官巡茶陝西時茶禁久弛官茶壅滯不行疏其宿弊酌爲經久計又條上便宜十事按遼東治將帥之貪殘者不少貸一年內封

太原府志

卷三十六 人物

五

事五十餘上再按河南值鄉試得人稱盛屬吏貪婪者按實褫職中州人以閻羅稱之

陳璘字邦瑞陽曲人宏治癸丑進士授太常博士從享南郊爲孝廟所知遷監察御史巡居庸關躬歷險阨相地勢增戍兵再巡山東疏罷礦役引蔡河入曹利運道修理闕里孔廟外轉浙江僉事遷陝西苑馬少卿少師楊一清總制三邊荐授叅政督軍儲士馬皆宿飽遷河南

按察使痛治豪猾倚宗室爲奸利者鎮守王太監素橫肆震其威亦奉法維謹遷右布政使轉左擢都御史巡撫湖廣以邊才改延綏廷推兵部侍郎念父母年高請終養不許武廟西巡駐蹕延綏時江彬用事張甚璘威望素著凡事持大體不詭隨彬爲斂迹未幾父母訃後

先至慟哭請終制廷議駕南巡上郡重鎮非璘不能殫
歷奏令奪情候代比世廟八繼始得歸治喪事璘游歷
中外功績茂著初通籍政府授意令一來謁當授庶常
卒不往識者早見其梗槩云

閻睿字汝思祁縣人宏治己未進士授永清令縣蝗睿發
粟易蝗民捕之積萬餘石得不災既以公事至霸州州
人願借以爲守縣人爭之訟於中丞洪洪曰閻令風憲
品豈郡縣所能畱哉尋召入永清人畱靴誌感正德辛
未流賊至郊賊首齊彥明睿舊抵禁也感睿德繫馬數
匹於門泣拜而去巡撫李毅齋寄詩曰強暴思恩會繫
馬市民懷德願畱靴拜陝西道監察御史清甘肅諸鎮
倉糧糧多虧折官不能償睿革兜攬兌給之弊設法取

太原府志

卷三十六

人物

六

盈釋淹滯之員六十人舊例官軍馬斃本人自賠有典
妻買馬者睿命屯地每頃出銀一錢以給營馬之用差
滿復命疏陳邊務數條悉採納之升浙江按察司副使
巡視海道豪右歛迹以疾告歸享年七十有二

薄彥徽陽曲人宏治九年進士爲南京御史論道士崔志
端不可玷尙書正德初八黨竊柄偕同官陸崑等極論
馬永成魏彬劉瑾傳興羅祥谷大用輩罪疏上而劉健
謝遷已被逐彥徽爲首復上公疏請畱健遷罪永成瑾
等悉逮下詔獄榜掠杖三十除名歸

寇儉字約之榆次人少與兄恭並爲諸生皆有聲博極羣
書雖盛暑夜分不寐宏治丙辰進士授大理寺評事陟
寺副駁覈多所平反丁內艱跣行奔葬寢食並廢憂勞

成疾卒年四十八

張天相陽曲人宏治己未進士陝西慶陽知府有循吏風民甚戴之

寇天叙字子惇榆次人由宏治辛酉鄉舉入太學與崔銑呂柟善登正德三年進士除南京大理評事進寺副累遷應天府丞武宗駐南京從官衛士十餘萬近倖多求索尹齊宗道憂卒天叙攝尹事日青衣皂帽坐堂上江彬使至好語之曰民窮官帑乏無可結歡丞專待譴耳彬使累至皆然彬亦止他權倖有求則曰俟面奏即予中官拘妓女數百多餓死以天叙言得釋禁軍攫民物天叙募人與搏而兵部尙書喬宇選拳勇者與搏戲禁軍傷慙且畏不敢橫駕駐九月南京不大困者天叙與

太原府志

卷三十六

人物

七

宇力也嘉靖三年巡撫甘肅回賊犯山丹擒其長脫脫木耳西域貢獅子犀牛西狗請却之不聽巡撫陝西寇入固原擊敗之斬首百餘又討平大盜王居等累賜銀幣歷官兵部侍郎

陳璧字德如太谷人宏治壬戌進士除行人司司副屢奉命出使藩邸却餽遺不受遷刑部員外郎歷郎中讞獄得情雖權貴不爲動出爲陝西左叅議會大軍勦鴟賊以饋餉功賜彩幣銀牌遷湖廣副使奉勅整飭郴桂衡永諸路兵備又以勦徭蠻功食從三品俸復奉勅撫治荆襄鄖漢等流民公正廉約直指以其績上聞一年丁艱歸遂不復出

解一經交城人宏治甲子舉人授平原知縣廉介寬仁修

學校鑄祭器遇荒捐俸以賑升南京戶部員外郎中補雲南廣西知府後乞歸隆慶間進亞中大夫壽九十六王範陽曲人正德庚午舉人授歸德知州會流賊數萬攻劫咸欲棄城走範諭以義設法調度卒保無虞有大姓梃人至死行金脫罪不受坐以法補陝州始終如一後罷官總督萬達禮聘籌邊且奏記委用辭疾歸年八十五卒

張文明字應奎陽曲人正德六年進士授行人擢御史巡按遼東尋按陝西鎮守中官廖堂貪恣捕治其爪牙二十四人堂大恨十三年車駕幸延綏文明馳疏諫極陳災異且言江彬逢惡導非亟宜行誅朝臣匡救無聞亦當罰治不省旣而文明朝行在諸權倖扈從者力裁抑

太原府志

卷三十六 人物

六

之所需多不應司禮太監張忠輩怒甚譖言諸生毆旗校文明縱勿治命枷赴京下詔獄明年春言官交章請宥不報比駕旋忠等屢請加罪七月命執至豹房將親鞠文明自謂必死及見忽命釋之謫電白典史世宗立召復故官尋出爲松江知府甫蒞任卒巡按御史馬錄頌其忠贈太常少卿

侯綸太原左衛人幼有異質嗜讀書於易學尤邃正德辛未進士授戶部主事歷禮部郎中出爲湖廣副使伸雪冤獄遇歲荒流離載道繪饑民圖上之得旨賑救全活無算嘗督大工出入會計雖緇銖必慎吏不得緣爲姦省費以巨萬計歷戶部侍郎子汝諒進士累官都御史亦以廉敏有聲

王卿字良佐太原人正德甲戌進士令上海武宗南巡有緣爲姦利者卿悉抗不應但曰車駕過日供不供自有令民賴以安歲災設法賑濟時疫流行捐藥餌調治江藩犯順令獲罪者以鐵贖戎器乃備稀簡權倖抑遏才頑理剔寃滯終戶部主事

張四維陽曲人正德丙子舉人授荏平令邑當衝疲民逃亡過半招撫流移均隣邑館陶地糧著均田圖宿弊盡祛升彰德府同知裁抑強宗革除冗費百姓立碑思之彭希曾陽曲人正德乙卯解元授開封通判嘗署篆長葛及鄆陵在長葛則修學宮執經問難函席恒滿在鄆陵則平土寇文事武備震耀一時考第一進階奉政大夫開封同知

太原府志

卷三十六

人物

十九

李春芳字元實陽曲人正德辛巳進士授陝西整屋令資性明爽值荒歲勸富以貸貧尤善營度計長久欽取兵科給事中遷順德知府

胡體乾交城人正德辛巳進士授貴州道御史巡按山東陝西南直累遷浙江副使終河南左布政宦遊二十載絕賄賂遠權勢不置田宅致政歸與親友詩酒爲樂屢荐不起

解一貫字會唯交城人正德十六年進士除工科給事中陳講學修德親賢孝親任相遠奸用諫謹令戒欲恤民十事世宗嘉納之嘉靖元年偕御史出覈牧馬草場太監閻洪奏遣中官一人與俱力言不可乃已還朝劾太監谷大用李璽奪產殃民罪由是內臣勦戚莊田六十歸

之民時營后父陳萬言第力請裁節復助楊廷和爭織造皆不納歷刑科左右給事中尋進吏科給事中教授王价錄事錢子勛以考察罷假議禮希復用一貫言如此將壞祖宗百年制事竟寢張璫桂萼擊費宏一貫言璫萼平生奸險特以議禮一事偶合聖心超擢以來恃寵靈凌轢朝士與宏積怨已欲奪其位而居之苟其計得行則奸邪氣勢愈增善類中傷無已天下事將大有可慮者詔下所司璫萼等銜不已竟謫開州判官以卒

楊永清陽曲人正德間知陝西隴西縣澹泊有守遇事理解悉中肯繁興學校繕城池嚴保甲息盜賊期年之間政事畢舉

太原府志

卷三十六

人物

三

陳經太原左衛人正德間任寧武守備敵大舉入關經奮勇戰死贈昭勇將軍立祠祀之

韓唐太谷人性忠鯁有胆畧正德間由太學生授萊蕪縣主簿流賊楊虎驅衆數千人來攻城聲勢洶湧唐意氣慷慨率子子思督鄉兵拒戰殺賊數十人力盡被害贈萊蕪縣知縣錄子思國子生後官鴻臚寺序班

土佑祁縣人性端方負經世學正德中以貢授廣昌令苗寇亂自福建大帽山抵縣境恣焚掠佑列木爲柵驅市人激以忠義相與效死寇破柵入猶橫刀巷戰殺數十人被執不屈死之

王鼎崑嵐人正德中以貢授永城令負氣好義受事時流賊趙燧等已入豫中知不免飭兵儲餉爲死守計城東

白洋河孔道也勅舟子往來者勿渡數日有持牒者驅徒十許人皆桎梏曰是所獲鄉導賊來寄永城獄中者甫渡卽脫桎梏殺舟子擁二萬人至城下鼎偕主簿曲啟訓導王景賢分城以守戒曰失守者斬鼎故善射連仆十餘人賊不敢近日暮曲啟遁賊破城入鼎聞變急下與賊遇持長戟力戰久之被執至死罵不絕口贈光祿寺丞錄子爲國子生

楊果陽曲人任西寧衛經歷調發軍興呼吸嚮應節使薦其能擢判晉州遷東平州同有政績薦知費縣益自淬礪下車釋逋負繫者二百餘人免租七千復業者日衆巡行阡陌問其疾苦二稅惟所有雖尺布斗粟隻雞束草皆得送縣輸者如流歲大熟勸富民出粟每社立倉

太原府志

卷三十六

人物

三

秋歛春散稍收其息以備歲饑凡開荒地復流民補給官牛栽桑棗立官莊撫按交章以卓異聞升濟南府通判掌文登縣事

寇天與字子立榆次人儉子嘉靖丙戌進士授戶部主事升員外郎中鞏昌知府調東昌性英爽蚤以文學知名服官所至有殊譽初以部署督遼餉凡出納條格公需程度皆所規定守東昌政務煩劇乃酌緩急關白以行訖無所壅乙未入覲治行爲東省最忌者假封事短之竟以廢卒

周鈇字汝威榆次人嘉靖五年進士授行人擢御史巡按陝西邊將多殺被俘來歸民鈇請嚴禁有報降五人以上者賞之詔可再按山東特改右春坊清紀郎兼翰林

院侍書俺答入寇鈇以中樞無籌策請早爲計責降廬
州府知事旋改國子監丞擢吏部文選主事坐與王與
齡發嚴嵩私屬事貶河間通判已而吏部擬擢南京吏
部主事嵩言鈇調官甫四月不得驟遷上詰責尙書許
讚鐫文選郎鄭曉三級鈇等褫職爲民廷臣論荐以嵩
在位不復召穆宗初贈光祿少卿

寇陽字體乾榆次人嘉靖己丑進士知廣平令著循聲升
禮部主客司主事歷升浙江僉事陝西叅議所至持廉
秉公人靡敢以私干商洛產金毫無取焉尋爲江西按
察使不阿分宜以浙江右布政落職居家以孝友聞

唐頤字子觀陽曲人希介孫嘉靖乙未進士官至臨洮知
府持已清謹居家儉約歷二千石而家業蕭然不干謁
太原府志 卷三十六 人物 三
不語時政得失循循退讓家居四十年學者稱爲東巖
先生

李應時太原前衛人幼穎悟篤學強記髫年名籍諸生間
登嘉靖壬子鄉試謁選授兵部司務絕苞苴請托同僚
嚴重之俸滿量移南京戶部員外郎甫八月致仕囊橐
垂竭不能治行李賴故人爲郡守捐貲相助得歸里頽
垣破屋不蔽風雨薄田不能供饘粥地方當道自公事
外無私語或有餽問必公諸族人尤工詩文博學廣稽
卽天文地理星相醫卜無所不究而居已恂恂與人處
無衆寡小大必以誠敬以孫成名貴贈通議大夫戶部
右侍郎

李希洛字宗程陽曲人嘉靖癸丑進士倜儻有大畧授昌

黎令時關中地震民多被傷遂移知渭南掩骼埋胔恤流亡民建祠祀之拜戶科給事中忤相嵩歸里事兄通判希濂愛敬純篤士民婚喪不能舉者傾貲賙貸歲旱捐廩煮粥濟活頗衆所著有益言錄政學訓言錄明儒要言性理守約集夢心說

孫允中太原人嘉靖三十一年爲給事中巡視光祿寺提督中官杜泰乾沒歲巨萬少卿馬從謙奏發之泰誣從謙誹謗允中偕御史狄斯彬劾泰如從謙言詔下從謙獄以允中黨庇謫邊方雜職從謙竟杖死而泰獲宥允中後累遷應天府丞卒

趙體敬字克禮太谷人嘉靖壬戌進士授行人兩使親藩餽遺悉却升兵部主事歷員外郎中擢鳳陽知府持操

太原府志

卷三十六

人物

三

冰蘖敷政惠和兩課俱爲諸郡最遷四川右叅政

李敏字融南榆次人丁未進士選庶吉士授刑科給事中庚戌邊警保定楊中丞以援遲被逮敏力救之廷杖被謫後復升禮科給事中不從醮事行香又被杖累遷至順天府尹自陳歸里徜徉原澗別墅十餘年終

褚鈇字民威榆次人嘉靖乙丑進士授河間令畿輔近地稱難治鈇蒞任詳而有體循聲冠三輔徵爲監察御史遇日食上疏陳六事出按陝西茶馬藩府欲得牧地爲湯沐邑力爭遏其請再按河南周趙二藩有酗縱爲民害者奏治之督南畿學政累遷右僉都御史巡撫河南疏免逋稅九萬有奇召入內臺佐院事遷大卿寺卿再遷工部侍郎值興慈寧工庀材量費悉出手畫尋以勞

邁疾請告歸病痊起復原官改刑部侍郎中丞李材以
言事忤旨再三執奏得釋遷右都御史兼戶部侍郎晉
尚書領漕務兼撫江北淮水泛溢陵寢及漕將被患築
周家橋塞黃堍口繕完歸仁故堤陵與漕兩無害事聞
加太子少保後兩宮三殿災陳時政急務語極剴切不
報疏乞骸骨屢上始命馳驛歸卒贈少保賜祭葬如例
邱陞岢嵐人父麟正德中戰歿有忠名陞慷慨負氣節嘉
靖間以衛指揮遷北路口遊擊倭寇犯江南簡邊陲將
征之陞與焉率水陸衆並進屢戰皆捷獲賊千餘人以
功擢揚州叅將凱還過叢林遺孽數十人猝出邀其歸
路陞橫刀躍馬徑前薄之賊黨驚潰陞亦中流矢死事
聞贈都督命立廟如臯春秋祀之廕子世襲衛指揮

太原府志

卷三十六 人物

十四

董綸字彝之太谷人判官文博子嘉靖間由太學生授歸
德府檢校賊師尚詔作亂太守廉綸材命署巡捕事獲
賊黨數人將誅之爲當事所阻不果已而夜斫門招外
賊人綸手執鋤刀率姪董魁並一僮戰於衙巷妻賈氏
亦執鎗以從被執與妻姪四人相對就死事聞贈歸德
府同知錄子良臣爲國子監生

畢文字載道先世和州人以軍功授太原衛指揮倣儻有
奇氣初署寧武所再署八角堡守備繕城訓士尋以陝
西都司罷歸撫軍王知其材辟掌中軍事後復起陝西
都司陞雁門遊擊將軍禦敵東峪口俘馘有差已復誘
擊蕎麥川破之爲仇者搆陷下獄適標兵變焚劫公府
以巨木撞獄門邏拜文前願奉之舉大事文怒甚罵曰

若等受國恩不能効犬馬報乃欲爲滅族計耶賊進以刃迫之文益罵不休遂遇害後撫軍萬立祠北門內檄有司春秋祀之

閻大綸榆次人嘉靖間貢授安吉訓導講明正學士習不
變擢容城教諭誨士亦如安吉後以仲子樸貴封翰林
檢討大綸履行端粹父疾焚香虔禱減已壽以延父齡
兄性剛烈委曲承順時稱孝弟

魏朝宗字統元岢嵐人由貢授彰德幕府有廉幹名進知
清澗凡有利於民者悉殫力致之比歸郝光元送以詩
曰琴鶴應隨去空餘墮淚碑

李聯芳岢嵐人幼失怙恃賴庶母郭氏育之襲伯父指揮
職常以忠義自許歷官大同得勝堡叅將初開馬市威
太原府志

卷三十六

人物

三五

名震敵升臨洮府總兵歿於陣

戴光啟字仲升祁縣人隆慶辛未進士授會寧令省費寬
徭履畝均賦修關城擒盜首邑人立祠祀之行取給事
申請臬憲攝馬政請嚴庫給關防議撫臣修問刑條例
疏太監用營馬論劉世延不守法多見採納奉命閱三
邊條陳八事遷河南叅政設方畧以賑饑民招應募以
達潞府轉按察使兵備寧夏策要賞敗市之謀論兵丁
汰浮之怨督府倚賴之遷河南布政致仕葺學宮立書
院建文昌閣凡關地方事皆力爲之年七十五卒

王繼夏岢嵐人萬歷癸酉舉人授陝西寧遠令邑當通衢
供役擾攘而地多磽瘠水漲陂汙一值荒歲無復生計
民胥疲於賦役繼夏乃捐冗費禁苛取平均驛置之序

勸農力耕覈社倉教積貯墾荒萊招流亡因山就澤聽
自利不爲禁庾橐咸以充盈於是舉鄉約申六訓延見
諸生考德問業鼓鐘間作聲詩繼之諷咏不輟又增築
隄堞鑿渠引水後世利之

馬朝陽太原人萬歷丁丑進士累官四川兵巡道征楊應
龍有功請告歸閉門課子外事盡却廵方喬允升嘗求
一面終不允後卒妻程氏守節凡四十年

萬自約太原右衛人萬歷庚辰進士授唐縣令爬搜悍黠
舊俗一變擢刑科給事中改戶科前後劾罷兩尙書兩
都御史一翰林學士出爲陝西漢中僉事潔已率屬罷
諸不切務居二年遷尙寶司少卿再遷光祿寺少卿適
倭犯朝鮮主兵事者謀以封貢款之抗疏力爭遷南京

太原府志

卷三十六

人物

三

太僕寺少卿尋以原官名還修舉馬政歷太常寺卿晉
順天府尹時大內方索珠寶自約悉與停罷坐是解組
歸

王宗賢字淑顏清源人萬歷戊戌進士授成都府推官精
心讞決獄多平反升戶部主事監督南新倉耗蠹一清
節剩以萬計改吏部主事轉考功司郎中典試中州得
士爲盛當京察時門戶角立宗賢獨持平尤陰護善類
升叅知分巡鳳平道地方賴以綏靖時督院劉重其才
偕閱塞上凡綜覈稽查皆倚辦焉以勞卒於官

王元雅太原衛人萬歷甲辰進士歷官都御史巡撫遵化
崇禎間城陷冠帶縊死於公署全家以殉三年正月巡
撫方大任言元雅有失城罪而一死節概凜然足以蓋

愆樞輔孫承宗請卹殉難諸臣亦首元雅而以大吏故
贈卹不及

李成名字寰知太原衛人萬歷三十二年進士授中書舍
人擢禮科給事中疏陳銓政失平語侵尙書趙煥又劾
方從哲并及其子恣橫狀尋移疾歸後起山東副使天
啟初遷湖廣叅政入爲太僕少卿四年春擢右僉都御
史巡撫南贛魏忠賢以成名爲趙南星所用因所屬給
由犯御諱除其名崇禎初名拜戶部右侍郎以左侍郎
專理邊餉改兵部召對平臺區畫兵事甚悉數月而罷
卒於家

閻世科太原人性醇雅好學萬歷甲辰進士初任湖州府
推官清滯獄數百又疑獄數十起悉決之歲大禱捐俸

太原府志

卷三十六 人物

三

爲倡賑之舉升戶部主事督遼儲平收放捐公費共一
千五百餘兩助餉查營伍虛耗積銀三萬餘兩報部奉
命備兵寧化值兵變棄幼子單騎出關謹斥堠繕甲兵
嚴偵探卒獲安全

鄭宗周字伯忱文水人主事之僑子幼英敏讀書西山甘
泉寺萬歷丁未成進士授鉅鹿令調唐山令擢監察御
史列首輔方從哲奸狀光廟崩復累疏李可灼崔文昇
罪出按福建首正宋李忠定公祀典廉墨吏寘於法時
閹黨熏灼惡宗周異已竄名紅丸案內將中傷之會遇
外艱不果莊烈正位起掌河南道遷太僕寺少卿發計
樞二部匿情釐遼薊諸鎮宿弊前後疏四十餘上晉正
卿擢兵部右侍郎巡撫天津遼東失守民相率徙內地

加意撫輯尋遇內艱奔歸終制不復出

王在臺字爾基文水人萬歷癸丑進士授滕縣令值游饑設法賑貸福藩內侍求昭陽湖地爲贍田力與抗拒得免入爲戶部主事遷郎中督通倉再督延儲璫禍作告歸家居四年補原官遷知漢中府政先教化有文翁遺風獨嚴治瑞藩監尉之奪民田者遷布政司叅政分守關南時流寇掠興安募兵固守先是在漢中勦賊常板子等俱有功至是名益著廷推鄖陽巡撫以病未任歸卒

尹同臯字舜鄰興縣人就湯子萬歷癸丑進士授密雲令賑饑蠲逋擢兵科給事中改工刑戶三科給事中前後疏七十餘上而錢糧京察屯田保甲諸疏議尤中時弊

太原府志

卷三十六 人物

三

遷太常寺少卿後歷僉都御史巡撫四川削平奢崇明之亂加兵部右侍郎致仕歸遭親喪廬墓六年推愛宗族拯危濟急有范文正遺風著有畏天齋實蹟撫蜀須知諸書行世

程謙字六吉岢嵐人萬歷乙卯舉人崇禎間知陝西西鄉令勤敏廉肅吏胥畏法署洋縣城固值流賊始起都邑悉遭蹂躪謙獨設法督民守禦三邑俱安藉無虞父老咸稱名杜

姚一麟陽曲人萬歷乙卯舉人授陝西中部令值崇禎初饑饉頻仍盜賊踞城廬舍灰燼民僅孑遺一麟至極意軫恤撫殘黎復縣治漸有甦機嚴明果斷吏無訛法民獲寧宇歷升漢中知府

張養字惟直榆次人父九河爲汜水令以善政聞養登萬
歷丙辰進士初授中書舍人主考山東所取皆知名士
拜御史論劾不避權貴如東江開賞糜費當舉忠魂褒
錄等疏尤爲時所推巡視淮揚鹽政潔已通商極力振
刷清出浮課二十餘萬貯公帑奸人側目誣以公費爲
私囊下刑部獄禁錮八年後得歸里卒年八十二著有
四書主意禮經獨解禮記纂言等集子天保有孝行舉
進士歷官吏部考功郎

吳用極字心銘清源人垂髫時有志陽明之學隨父任元
城問業趙高邑南星學益進及父任徽州州多礦賊出
奇計破之文名日起年十九舉萬歷戊午鄉試時邊警
屢至嘗拊髀而嘆思爲國家効力崇禎間流寇猖獗用
太原府志 卷三十六 人物 无
極居南關中日夕經營爲固國計已而賊夜至用極仗
劍登陴血戰死關人感其忠捍禦益力卒獲保全事聞
詔以義烈旌之

成材清源人萬歷間貢知陝西宜川饑饉枕籍賊盜內訌
材恩威兼用撫綏饑民折衝外寇宜城賴以保全

武維周太谷人天啟甲子舉人知直隸大城縣政簡刑清
後以守城中流矢死贈光祿寺少卿祔祀三忠祠

戴運昌祁縣人布政光啟子少績學年四十九始領天啟
丁卯鄉薦又十年成崇禎丁丑進士初知河南尉氏令
清廉慈惠折獄以情邑有亡命聚徒數千人將爲亂潛
授方畧擒其魁斬之調良鄉縣入爲戶部員外司練餉
殫力國計旋以陳演牽連下獄後入鹿臺山中閱二十

年卒

張鳳奇陽曲人舉於鄉崇禎初爲永平知府三年正月城陷鳳奇闔門死贈光祿卿祭葬廕一子

王冠字元甫榆次人嘉靖丙午舉人選河南鹿邑令邑境有盜魁聚衆爲人害且將謀亂冠設方畧悉擒之除蠹吏無敢爲奸冠在官以治狀被旌凡薦者三十有六擢靜寧州未幾卒邑人爲之立祠

左應選字六語榆次人天啟辛酉舉人授昌黎令值遼東用兵所向披靡應選獨保孤城悉力守禦四十餘日城獲全以功擢薊州僉事時宜興當國以枉法事屬應選應選不爲屈宜興銜之嗾以他事遂被逮謫戍汾州

樊子英晉府典仗官闖賊入府被執不跪睨地下一大磚猛力提擊中賊帥幾死羣賊擁見逆闖慢罵如故賊勒殺之

陳心鏡徐溝人崇禎間由舉人任欒城令城陷心鏡自刎先是其妻王氏投繯死兩媳亦皆王氏投井死至是從死者復三十餘人欒城人爭立祠祀之

朱慎鉦代府宗室闖賊入城殺宗室憐其老欲釋之慎鉦大呼曰奈何不殺我延頸就刃而死其子霞郡庠生先於城陷時至圓通寺前投井死

朱小二寧化府宗室子闖寇太原與其妻及一妓張飲已聞城陷逼其妓縊妓少難小二卽拉殺之隨與妻投繯死

朱文衡朱長安並雲邱府宗室子闖賊陷城胥見執不屈

死之長安妻 氏及弟媳輩十餘人皆投井死
瞿通晉府儀衛司人城陷先令家人自縊遂自焚死

王德新晉府羣牧所千戶闖逆破城晉王被繫德新見之
憤甚投晉邸菊花園井死母李氏年八十亦死

司鼎前衛千戶守北城城陷語家人曰我當死汎地遂登
城被殺

劉秉鉞前衛指揮城破被執罵不絕口與右衛指揮馬負
圖同時被殺

江明北城鄉約率夫守堞賊登城衆皆潰明獨不去被殺
申鼎欽太原左衛人原任大同守備賊入城奮佩刀馳騎
殺賊二人羣賊擁至擊殺之

韓似雍太原前衛指揮守東城城陷似雍力禦死之

太原府志

卷三十六

人物

三

陳功陽曲人賊至被執不屈死之

朱敏柰字麓松晉藩宗室授龍門通判聞闖陷太原意家
屬必遇害乃設父靈成服而祭既又設香案望闕拜謝
粘小詞壁間有君恩難負五倫須顧語遂投繯死

陳三接文水人舉崇禎六年鄉試知河間令歲饑人相食
三接至兩卽降有疑獄數年不決立判之妻武氏賢三
接見封疆多故遣之歸答曰夫死忠妾死節分也十五
年閏十一月殉難於巷武氏亦從之贈僉事

朱廷鄣代府宗室崇禎中爲鞏昌府通判署秦州事有廉
直聲十六年冬賊陷城賊帥使跪朱叱曰我宗姓頭可
斷膝不可屈賊欲活之大呼曰今日惟求一死乃見害

武象乾太谷諸生固原州同知國清子國清署鎮原縣事

爲闖賊所執累置死地志益堅象乾承庭訓又時教其三子甲申闖賊至象乾與城守之役捍禦盡力城破將驅衆巷戰衆潰因歸伏臥室中冀乘間殺賊頃之一賊入手刃之連斃數人餘皆悸莫敢動亟呼其黨揭屋以入象乾被擒與三子俱死人稱三世忠義云

朱慎鏤晉府宗室攝靈邱郡王府事賊陷太原冠帶祀家廟驅家人入廟中焚之已亦投火死

任萬民陽曲人崇禎間諸生常著救時八議守城十說獻之撫按荐授城武令任三載城破死之又庠生彭鯤以父參戎振雲陣亡任百戶闖賊陷城拔刀以待格殺數人遂被害又庠生魏選奇城陷急抵家妻爲賊迫奮拔賊刃殺賊與妻同被害貢士孫禛授蒲州學正城陷投

太原府志

卷三十六

人物

三

井死舉人張景維授河南光山令未之任被執不屈賊殺之田大治乘城陷衆潰拔刀獨畱賊問何人曰吾諸生也專砍汝頭賊殺之

張璞徐溝人由恩貢初任縣丞升狄道知縣癸未闖賊陷晉執璞不屈施以桁夾甲申闖敗東歸時鄉紳被執未死者猶幽禁闖至挾璞及其妻陳氏械送西安璞與妻同縊於西安寺中

國朝

羅曠字鏡初清源人萬歷戊午舉人授延川令時土寇披猖所在悉被焚劫曠訓練民壯城獲保全尋守滄州

國朝順治乙酉遷戶部郎中西寧僉事甘鎮久不靜曠撫邊民懷西羌始得晏然家居數載好善不倦邑人仰之

裴希度字晉卿陽曲人崇禎甲戌進士授堂邑令時歲荒賊擾實心撫字民賴以安行取入京授工部主事釐奸剔弊夙蝨一清擢御史務持大體不沾沾許人陰私賊陷太原母投別墅井中死希度痛念母節乃捨別墅爲報恩寺

國朝游升太常寺卿致仕歸年六十有三卒所著有澹明野嘯息齋藏書等集

李家選陽曲人前明丙子舉人懷慶府推官

國初授懷慶府知府單騎入太行招士寇范以忠鄭國安等胥令復業又請豁逋賦二十餘萬民德之擢湖南道卒

桑芸字笈雲榆次人家貧借書讀竟輒不忘崇禎己卯舉太原府志

卷三十六

人物

三

於鄉庚辰成進士

國初補行人司行人尋擢御史巡按畿輔歷光祿寺卿復外補汝南叅政墾荒土數千頃除無藝供數千兩積猶白福德肆爲不軌廉得之將寘諸理橐千金求免大聲叱去立斃杖下遷廣西按察使桂林守兵素橫痛繩以法不少貸比入覲遷河南右布政行至南昌卒芸蒞政果斷中外咸樹聲績卒後卹典獨隆

胡全才字體舜一字韜穎文水人性豪邁有方畧前明癸未進士觀政條陳禦寇機要授兵部主事贊畫李建泰軍至正定率所部百餘人樹疑幟於固關寇遙望不敢進順治元年授車駕司郎中遷陝西漢羌叅議道時有賀珍之亂尤總鎮避西安全才招民兵環鎧力戰擒斬

僞兵備宋朝美等已而川孽張定國駐保寧謀犯漢中
乃佯遣牌掃除傳舍聲言迎大軍而遣叅將嚴自明馳
擊保寧平四月賀珍自西安敗回復圍漢中立城頭堅
守月餘會援兵至城獲全擢右副都御史巡撫寧夏瀕
行猶親勦蕎麥山砦賊孫守法等殺賊一萬四千有奇
四年寧夏賊馬德猖獗李彩繼起督將士戰預望城再
戰河兒坪德死彩亦就擒後以穆遠案罷尋起補江西
饒南叅議道經畧洪承疇稔其才疏請隨征湖南旋巡
撫鄖陽時郝劉袁塔高李諸賊環師攻鄖舊撫病請歸
全才令將士由賊充斥地以進賊遁乃馳至穀城白虎
山南漳蜈蚣寨相地形列營檄諸將督兵進討會河灣
廟灘白土關之戰後先告捷賊黨始散是役也斬外降
太原府志

卷三十六 人物

三

將黃鳳昇等百人降丁羅萬兒等五百餘人救難民徐
自嘉等萬餘人擢兵部右侍郎總督湖廣旋以疾卒於
官贈兵部尙書諡勤毅子應麟廕入監仕至天津道僉
事孫纘成進士

孫世蓋字丹臺興縣貢生工文而勇精騎射順治初訓導
臨縣遷垣曲教諭再遷崇仁令大盜羅漢七聚衆萬餘
前令將勦之謀泄遇害世蓋至念縣人胥通盜無可共
事者獨與其僕密謀之而陰厚千總孟暨警提胥吏乃
佯爲懼怯遣人語漢七曰功令不勦盜者軍法從事今
縣小無兵吾且降幸將軍至某鎮與吾面計事及期漢
七率衆二千駐鎮外偕其黨吳暨校三十八人入鎮世蓋
設廣筵宴校廳外迎漢七暨吳於廳而徐呼千總來漢

七色變則命千總解刀勸飲飲極歡復移樽於園世蓋揮僕曰吾與將軍有密言爾曹不得聞携漢七手入園猝摔之仆地吳拔刀千總亦自後摔仆之而僕急入縛二賊乃名鷲捷胥吏授以弓弦曰吾出勸三十人酒汝伺後俟吾擲杯彼仰觀汝卽以弦扼其喉如法縛二十五人而逸五人去曰吾無兵怖之可胥走也二千果遁明日率鄉勇擣巢則巢胥空矣事平撫按議交章薦世蓋以老力請歸卒年六十有五

原明田字我潛興縣人少有遠志喜讀書凡天文地志河防農政等書靡不殫究順治戊子舉於鄉考授保定府刑推廉正自持吏無爲奸擢工部屯田主事陞員外出爲淮徐河道至則河決黃家嘴直灌沐陽海州等處桃

太原府志

卷三十六

人物

三五

源一帶且爲魚鱉明田日夜露處率屬搶築三月而大工竣宿遷又決搶築如前因於桃源黃家嘴并洛馬湖徐昇壩數處皆堅築重堤置守如南岸旣報命以勞成疾告歸卒

常大忠字二河交城人順治壬辰進士銓梓潼令調潛山履畝清丈計畝編里俾無贏縮建三立書院買學田創庫樓立眺臺擢保定府丞郡有楊忠愍祠朔望必往拜重修旌忠祠建忠烈祠祀甲申盡節諸臣無何疾作肩輿往勘完縣災自出囊金賑之越數日疾卒櫬不能行衆賻之乃獲歸葬

閻毓偉徐溝人闖賊入晉授僞官弗受遂刳其母至陝賊平負母還鄉刻志讀書順治辛卯壬辰聯捷授江西吉

安府推官與郡中生徒講道德課文藝士皆感化有暮
夜餽千金者力峻却之擢吏部尋出差江淮鈔關以廉
介聞丙午典試陝西尋遷刑曹臨事敬慎有疑案輒力
爭可否以戇直稱年五十餘遂致仕歸遺產悉讓弟姪
邑中有貧不能婚葬者悉以積俸給之徐土瘠多旱爲
開嘉平渠引洞澗水以灌邑人至今利之

鄭崑璧字崙輝文水人祖死於闖賊父亦殘廢崑璧奮志
讀書順治戊戌成進士銓富平令縣南漆水沮水金定
河北溫泉河胥可灌田崑璧相度高下疏支渠濱河地
胥爲沃壤編審均覈緝盜捕逃井井有紀巡撫賈漢復
亟稱曰鄭尹可謂精神滿腹矣以一等行取兵部主事
同考丁未會試稱得八旋以戶部郎中出爲湖廣督學

太原府志

卷三十六 人物

三六

道楚地遼瀾南北奔走以勞成疾數年卒

鄭崑璽字殿光文水人康熙壬戌進士授三河令調普寧
安化所至以廉能著稱爲吏部驗封司主事遷員外郎
中晉戶科給事中僑居古寺布被紙帳澹泊如諸生論
者稱之

傅山字青主一字公他陽曲人祖霖山東遼海叅議父之
謨明經授徒稱離垢先生山其仲子也生而穎異讀書
十行並下善詩古文詞尤工書畫年十四補博士弟子
員十六餼於庠督學袁公深器之命讀書三立書院時
時以道學相期許後袁被誣下獄山徒步千里伏闕訟
寃由是海內無不知傅山其人者迨袁誣旣白出督九
江屢遣使召山山不往李自成亂山遂棄弟子籍遊遊

平定祁汾間或坐深山閱釋典戶外事弗聞也康熙戊午舉博學宏詞科屢辭勿獲抵都門復以老病辭特授內閣中書放歸越六年卒山居母喪臥苫枕出食粥不茹蔬者百日先人遺產爲其弟蕩費殆盡無怨色及弟歿遺孤尙幼山撫之不翅已出其天性如此及卒四方會葬者數百人所著有性史十三經字區周易音釋周禮音辨條春秋人名韻地名韻兩漢人名韻若干卷子眉亦以善書名

張旺字月宇興縣人少能挽十五石弓左右馳射束髮從軍爲廣東將軍何某所知授千總時吳耿構逆題授守備援漳州府復永定縣十五年從征尙逆粵城內砲火烟飛弩石蝟集衆錯愕莫敢先登旺持短刃大呼先登

太原府志

卷三十六

人物

三

城埤賊披靡我軍乘之城遂破奉調入閩勦山海擒渠寇陞福建右營遊擊復龍虎山暨長泰縣諸地隍池十九年大徵甲士海上而軍門不習水師諸將亦不克舍騎從舟旺獨率支軍復十九寨暨海澄隍池又平金門廈門諸島陞左都督給拖沙喇哈番歷陞福建水師提督四十一年勦廣東八排明年又勦湖廣紅苗卒贈太子少保祭葬如例

溫而厲徐溝拔貢姜逆之變山賊四起被繫至太原而厲直言正氣以大義責之竟禮而歸衆服其膽識後仕山東莅平縣承開墾荒田百餘頃以修河功升江南句容令時軍務叢集嘗於馬上判事邑人頌爲神君卒於官高士達郡庠生己丑姜瓖叛委署平遙令蒞任七日城陷

被執賊勒授僞職不從遇害

王廷衡陽曲人武解元任都司營中軍姜賊據晉祠廷衡繕火具攻之不克自焚死祀忠烈祠

張占鰲太原人康熙三年由拔貢任荊州府通判西山李亨亂占鰲運糧遇賊不屈死之

張成功徐溝人康熙間以千總隨征雲南苗蠻負固不服成功力戰被賊斷臂墜馬死事聞封義勇將軍子緯蔭授雲南千總

成元震字東權文水人父性江南守備元震生而瑰異康熙戊子舉於鄉授守備陞河標右營遊擊調常州常之宜荆臨太湖素稱盜藪元震夜乘小舟督諸哨船分巡各港汊擒其魁商旅以安遷江南叅將轉副將會總督

太原府志

卷三十六人物

三

楊超會欲撥營馬協濟驛務集兩司議將決元震力持不可超會色變兩司數目元震元震不爲動翌日超會一意解乃止有以蜚語誣南昌鎮者制府將劾奏以元震代元震爭之獲免其守正不阿類如此陞山東總兵母憂服闋除江西總兵調河州鎮州故番漢雜處好鬪有司聽理不平輒興大獄元震飭番漢各治其人始安堵晉甘肅提督畜牧蕃庶番人有竊馬者其酋素服謝罪元震諭以中朝威信咸懼伏準夷聞之亦相戒無敢犯旋坐事左遷廣東總兵改授兗州外艱服闋補江西總兵以年老乞歸卒子邦彥乾隆丁卯舉人東昌府同知汝舟江寧府知府邦直乾隆庚午舉人汾州府教授孫嘉淦字錫公興縣人康熙癸巳成進士改庶吉士授編

修母憂歸雍正元年起補原官陞國子監司業以直言
極諫稱三年視學安徽四年遷祭酒調直隸學政差竣
還任先是嘉淦爲司業時曾以人才出於學校而科目
僅取文藝無裨實用宜令天下學政選拔諸生貢太學
九卿保奏經明行修者任助教學正等官以經術造就
之至是復上言別置學舍支帑金爲膏火資乃

命戶部歲給銀六十兩賜學南官房三百餘間外艱歸起補
順天府尹署工部侍郎十年遷刑部侍郎奏對不稱

旨逮獄擬罪旋釋之署河東鹽政今

上登極授戶部侍郎晉左都御史上三習一弊書乾隆六
年遷刑部尚書二年總理國子監事務時承楊文定公
後執經者數千人嘉淦奏倣文定經義治事一齋法砥

太原府志

卷三十六

人物

三

礪刮磨咸知實學三年轉吏部尚書授直隸總督直隸
旗民雜處號稱難治嘉淦蒞任凡賑饑通運開河捕蝗
諸事次第興舉其尤著者晉州小兒被殺村民紀懷讓
誣服獄既具嘉淦奏請覆審寃得以白環京皆旗圈地
奸民徃徃益租奪佃嘉淦酌定租值奪佃之風遂息其
明敏果毅類如此五年移制湖廣八年調撫福建尋罷
九年起授宗人府府丞遷左副都御史十二年乞休歸
十四年復授副都御史遷兵部侍郎晉工部尚書十七
年晉吏部尚書協辦大學士事務明年卒謚曰文定嘉
淦生平以誠居心以敬立學貴賤不以動其心夷險不
以易其操大約得力於克己復禮之學居多學者稱爲
懿齋先生所著有詩經補註易傳補義近思錄輯要若

干卷子孝愉由廕生官至直隸按察使

鄭士俊字灼三文水人雍正癸卯舉人少醇謹事父及繼母以孝聞以經義教授弟子十餘年多所成就由筦庫遷桐廬令桐濱大江秋水驟溢俊募漁舟救援全活無算開倉賑粥計口給米或懼專擅獲戾俊曰與其民死而官無恙孰若活民而失官乎上官如所請邑有盜客金者其父發之復有殺人者其父亦縛以獻民不忍欺多類此調慈谿被議降開封府經歷卒年七十七

王志曾字欣沂陽曲人雍正乙卯拔貢選授山東莘縣知縣調諸城撫循士庶不恤勞勩歲饑力請於上截漕數萬全活甚衆旋因徵解未完落職子雯成進士澤州教授

太原府志

卷三十六

人物

四

李如蘭字長芳榆次人徙居陽曲以貢授澤州訓導例改主簿奏對稱

旨超擢高郵州知州居九月陞紹興府知府調江寧府知府

江寧人民稠雜豪猾爲奸如蘭命捕之杖殺數人而將軍所轄兵素囂悍如蘭豫請於將軍一繩以法陞江南廬鳳道晉四川按察使所至察吏安民悉心籌畫自懷遠至壽州湖港交通久爲盜藪徃徃藉捕魚爲業捨却行旅如蘭廉得其實戮渠魁數人而自某地至某地若干船皆有編號又復增塘汛立保甲盜患遂息成都華陽爲四川附省縣舊責以領銀納米給兵餉百姓苦之如蘭言於巡撫與外州縣均而民困以甦乾隆八年轉江西按察使兩蒞事值歲稔流民數萬集會城如蘭請

截漕十萬賑之全活甚衆及其去也百姓扶老携幼哭送於道晉四川布政使卒丁天培辛未進士廣西左江道永祺甲子舉人四川松茂道孫履謙廣西潯州府知府

楊二酉字學山太原人雍正癸丑進士改庶吉士授編修以工書入直每進一帙輒拜文綺之賜陞貴州道監察御史巡視臺灣請建書院免臺屬積逋臺之民比戶戶視焉尋陞工科給事中轉兵科掌印給事中奏停採買減關稅除耗羨又論浙中兵餉銀色粵中土豪虐民等事疏上皆報可以年老乞歸年七十六卒

李全陽曲人雍正八年以行伍出征西番屢著勞績洊陞雲南永順總兵將軍明瑞保任提督乾隆三十三年正

太原府志

卷三十六

人物

聖

月隨征緬匪連奪數寨緬匪率衆猝至全奮勇當先身中鳥鎗而死崇祀昭忠祠葬祭如禮子萬年廕襲騎都尉又一雲騎尉補授四川遊擊征金川有功歷陞廣西右江鎮總兵

李璋字琳瑯陽曲人乾隆丙辰武進士初任湖廣守備辦理金川軍務著有勞績調宜章接壤粵東甲戌夏河水漲溢璋晝夜堵禦城賴以全陞湖北施南都司施南苦旱璋祈雨跪龍洞中兩膝著石處皆傷霖雨霑足軍民歡頌陞湖南遊擊廣西叅將右江總兵會緬匪不靖辦滇省軍需有勞績加軍功授武顯大夫

張凌霞太谷人乾隆丁巳武進士第二授二等侍衛出任福建督標右營叅將擢中軍副將破建寧賊魏現等十

五年擢雲南開化鎮總兵十八年坐事罷二十一年隨定邊將軍兆惠擊賊有功委署守備十月大兵進勦波羅泥都霍集自阿克蘇直搗葉爾羌凌霞爭先衝擊逆猗率賊二萬人猝至凌霞力戰身負重創沒於陣事聞祭葬如例崇祀昭忠祠子爾清廕襲衛千總

陳聖矩字子儀太谷人乾隆己未武進士授湖廣守備陞永綏都司四川遊擊三十七年金川不靖隨大軍進勦駐守堯磧屢立戰功小金川平調守馬爾達三十八年大營兵潰賊騎掩至聖矩且戰且守閱七日賊來益衆家僕王金印死之聖矩身被十餘鎗力不能支同其次子禮自焚死事聞給祭葬崇祀昭忠祠孫德文廕襲守備

太原府志

卷三十六

人物

聖

牛天昇字馨宜太谷人乾隆壬戌武進士授三等侍衛十三年推授江西興國營都司歷陞廣東將軍標遊擊湖北德安營參將調任撫標中軍陞湖南寶慶協副將湖北襄陽鎮總兵三十六年母憂服闋補四川川北鎮總兵隨征金川由木坪進兵攻克甲金達時賊衆分據要害天昇偵得蒲松岡一徑可通督兵越險六日而深入其地賊驚走三十七年春克達圍乘勝據木耳寨日隆關至巴朗山與大軍會旋分兵從南山梁進卷甲疾趨連克碉卡數處遂破斯當安寨又破日耳寨斷賊糧道秋七月直逼頭卡克之諸賊皆堅壁增壘雲梯地道俱無所施天昇懸賞數百金獲敢死士百人日夜奔擊遂破二卡取木蘭壩殺賊無算由降燈碉蒙古寨進攻八

卦寨與諸路官兵會賊僧格桑遁餘皆望風納款三十八年春分兵進勦控喀攻破南北山梁大小由厰崇德澤耳脚礪卡數十處小金川平夏五月陞授貴州提督屯控喀大營屯木果木與天昇相爲犄角六月大營兵潰天昇方食聞變投箸而起卽將印信付所親馳送督臣而自率騎赴援賊軍已大至天昇躍馬直前士卒從之自辰至未殊死戰天昇身受重創馬忽蹶猶手殺十餘人而死事聞奉

旨照旗員例議卹諡毅節圖像

紫光閣功臣之次崇祀照忠祠長子敬一

欽賜舉人次子敬憲廕襲騎都尉又一雲騎尉補授山陰路都司

太原府志

卷三十六

人物

聖

馬全初名琰字具堂陽曲人父雲翱陝西守備調金川叅將卒於師全生而奇偉有智畧能左右射乾隆壬申鄉會聯捷登進士第三授二等侍衛出爲福建撫標遊擊旋與同官忤罷乃復走京師投巡捕軍大學士傅忠勇公恆奇之仍命就試改今名己卯庚辰復聯捷登進士第一授頭等侍衛出爲江西南昌鎮總兵尋調崇明鎮總兵海外有羊山爲奸宄出沒之所全巡查嚴密奸宄潛遁一日舟行海上大風折桅衆相顧失色全仰天祝曰馬全奉

天子命蒞此土有負此心明神殛之士卒何罪祝畢風遂息三十四年陞江南提督三十五年自請往金川効力加領隊大臣五日至控喀卽殺賊二百餘級旋奪礪卡

十餘處時大軍屯木里木方爲進取計賊騎忽至全卽躍馬橫戈直前殺賊賊騎圍之數重矢石交集麾下士皆盡全身被重傷猶力戰死時六月十日也事聞祭葬如例諡莊節崇祀昭忠祠蔭子國銳世襲騎都尉又一雲騎尉除授都司

邢天培徐溝人乾隆甲戌武進士歷任四川茂州營都司乾隆三十七年領兵征金川三十八年六月陣亡崇祀昭忠祠孫清和廕襲千總

周玉隆陽曲人父某爲甘肅武弁遂家焉玉隆貌不魁梧而武勇絕倫以行伍擢把總大將軍兆惠征伊犁玉隆從常以爭先陷陣屢立奇勲會官軍屯山上賊悉銳扼我師衆軍懼玉隆持槍直入中堅縱橫衝擊一槍恒貫太原府志

卷三十六

人物

四

三四人槍起尸墮復大呼殺賊所向披靡賊膽落官兵乘之賊大潰所擊殺凡千數百人日暮收兵玉隆爲殿有賊騎尾之玉隆聞馬蹄聲急迴顧槍已及腰側身避之賊忽墮脇下乃一手扼其項一手挈其膊橫置鞍上比還而賊肋已斷矣兆惠見之大喜呼爲巴圖魯軍中以比常山趙順平云陞守備尋晉都司卒玉隆所用鎗二一長二丈重三十餘斤鋒六尺許下作八稜稜脊皆有刃一長丈四尺重二十餘斤鋒長三尺餘制並同又一精鐵簡長三尺餘橫插腰間戰酣則掣以擊敵當之者無不糜爛故所著功獨多而撮其大畧如此長子某亦以驍勇聞年二十餘歿於陣

文苑附

晉

郭琦字公偉晉陽人少方直有雅量博學善五行作天文志五行傳注穀梁京氏易百卷鄉人王游等皆就琦學武帝欲以琦爲佐著作郎問琦族人尙書郭彰彰素疾琦答云不識上曰若如卿言烏丸家兒能事卿卽堪爲郎矣遂決意用之趙王倫又欲用琦琦曰我已爲武帝吏不容復爲今世吏終身處於家

王修字敬仁小字荀子濛之子也明秀有美稱善隸書號曰流奕清舉年十二作賢人論濛示劉惔惔曰此論便足參微言起家著作郎琅邪王文學轉中軍司馬未拜年二十四臨終嘆曰無愧古人年與之齊矣

太原府志

卷三十六

文苑

聖

郭澄之字仲靜陽曲人少有才思機敏兼人調補尙書郎出爲南康相宋高祖引爲相國叅軍從北伐克長安更欲西伐集寮屬議多不同次問澄之不答但西向誦王粲詩曰南登霸陵岸回首望長安高祖意遂定曰當與卿共登霸陵岸耳因還澄之位至相國從事中郎封南豐侯卒於官所著文集行於世

北魏

閔湛太原人爲著作令史崔浩薦有著作之才拜中書博士後與浩同被難

王遵業瓊長子風儀清秀涉歷經史位著作佐郎與司徒左長史崔鴻同撰起居注遷右軍將軍兼散騎常侍慰勞蠕蠕乃詣代京采拾遺文以補起居所闕與崔光安

豐王延明等參定服章及光爲孝明講孝經遵業預講
延明錄義並應詔作釋奠侍宴詩時人語曰英英濟濟
王家兄弟轉司徒左長史黃門郎監典儀注與中書令
陳郡袁翻尚書琅琊王誦並領黃門郎號曰三哲時政
歸門下世謂侍中黃門爲小宰相而遵業從容恬素若
處邱園嘗著穿角履好事者多毀新履以學之以胡太
后臨朝謀避地自求徐州太后曰王誦罷幽州始作黃
門卿何乃欲徐州也更待一二年當有好處分遵業兄
弟並交遊時俊爲當時所美及公朱榮入洛以莊帝爲
從姨兄弟之親相率奉迎俱見善河陰贈并州刺史著
有三晉記十卷

溫子昇字鵬舉太原人晉大將軍嶠之後也世居江左祖

太原府志

卷三十六 文苑

四

恭之宋彭城王義康戶曹歸魏家濟陰父暉兖州左將
軍長史行濟陰郡事子昇初受學於崔靈恩劉蘭以夜
繼晝乃博覽百家文章清婉爲廣陽王深賤客在馬坊
教諸奴子書作侯山祠堂碑文常景見而善之故詣深
謝曰頃見溫生深怪問之景曰溫生是大才士深由是
稍知之熙平初中尉東平王匡博召詞人以充御史同
時射策者八百餘人子昇與盧仲宣孫搴等二十四人
爲高弟預選者皆受屈而去搴謂人曰朝來靡旗亂轍
皆子昇逐北遂補御史時年二十二臺中彈文皆委焉
服闋還爲朝請李神雋行荊州事引兼錄事參軍被徵
赴省神雋表畱不遣吏部郎中李獎退表曰昔伯瑜之
不應畱王朗所以發歎宜速遣赴無踵彥雲前失於是

還員廣陽王深爲東北道行臺名爲郎中黃門郎徐紇受四方表啟答之敏速於深獨沉思曰彼有溫郎中才藻可畏高車走珍寶盈滿子昇取絹四十疋深軍敗爲葛榮所得榮都督和洛興與子昇舊識以數十騎濟送達冀州還京李楷執其手曰卿得免足使夷甫慙德自是無復宦情閉門讀書勵精不已孝莊卽位爲南主客郎中修起居注曾一以不直錄尙書事元天穆奏代之莊帝曰當世才子不過數人豈容爲此便相放黜乃寢其奏及天穆討邢杲召子昇同行曰吾欲收其才用豈懷前忿也子昇不得已見之加伏波將軍爲行臺郎中元顥入洛天穆召子昇問之對曰元顥新入人情未安今徃討之必有征無戰王若克復京師奉迎大駕桓文

之舉也捨此北渡竊爲大王惜之天穆善之而不能用遣子昇還洛爲中書舍人莊帝還復爲舍人天穆每謂子昇曰恨不用卿前計除正員郎仍舍人帝殺尔朱榮子昇預謀赦詔乃子昇詞也榮入內遇子昇把詔書問是何文字子昇顏色不變曰勅榮不視之永熙中爲侍讀兼舍人鎮南將軍金紫光祿大夫遷散騎常侍中軍大將軍領本州大中正梁使張臯寫其文筆傳於江外梁武曰曹植陸機復生北土恨我辭人數窮百六陽夏守傅標使吐谷渾見其國主牀頭有書數卷乃子昇文也濟陰王暉業嘗云江左文人宋有顏延之謝靈運梁有沈約任昉我子昇足以陵顏轅謝含任吐沈楊遵業作文德論以爲古今辭人皆負才遺行澆薄險忌唯邢

子才王元景溫子昇彬彬有德素齊文襄引爲大將
諮議作神武碑文成以元僅劉思逸荀濟潛謀疑預知
之餓諸晉陽獄而卒太尉長史宋游道收葬之集其文
筆爲三十五卷子昇言有準的不妄毀譽撰永安記三
卷無子弟子盛州主簿有文才年二十餘卒

北齊

王修太原人風儀蘊藉天保中尚書北海王忻以雅談獲
罪諸弟尚守而不墜自茲以後此道頓微修與范陽盧
昌衡順邱李若彭劉泰珉河南陸彥師隴西辛德源並
爲後進風流之士

隋

王劭字君懋晉陽人松年子少沉默好讀書齊尚書僕射

太原府志

卷三十六

文苑

吳

魏收辟參開府軍事累遷太子舍人待詔文林館時祖
孝徵魏收陽休之等嘗論古事有所遺亡討閱不能得
劭具論所出取書驗之一無舛誤繇是人稱博物後遷
中書舍人隋初授著作佐郎母憂在家著齊書爲內史
侍郎李元操所奏上遣收其書覽而悅之起爲員外散
騎侍郎修起居注劭以上古有鑽燧改火之義近代廢
絕上表請變火從之又言上有戴干之表指示羣臣賜
物數百段拜著作郎屢言符命寵錫日隆時黃鳳泉得
二白石頗有文理遂附其文以爲字於是採人間歌謠
引圖書讖緯依約符命摭摭佛經撰皇隋靈感誌合三
十卷奏之上令宣示天下大業中遷秘書少監卒於官
劭在著作將二十年專典國史撰隋書八十卷多錄口

勅又採不經語初撰齊志爲編年體二十卷復爲齊書紀傳一百卷及平賊記三卷又指摘經史謬誤爲讀書記三十卷人服其精博

王頴字景文祁人僧辨子年數歲入關少好游俠年二十勤學累載遂徧通五經究其旨趣解綴文善談話年三十周武帝引爲露門學士每有議決多頴所爲好讀諸子又曉兵法益有縱橫之志隋開皇五年授著作佐郎尋令於國子講授上親釋奠論難孝經詞義蜂起國子祭酒元善見屈上大奇之超授國子博士後配防嶺南數載授漢王諒府諮議叅軍王甚禮之諒舉兵數進奇策諒不能用楊素至蒿澤將戰頴謂其子曰氣候殊不佳兵必敗汝可隨從我旣而自殺頴撰五經大義二十

太原府志

卷三十六 文苑

四

卷集二十卷

唐

王珣字伯玉方翼子與兄璵第璿以文學稱時號三王天授初珣及進士第應制科遷藍田尉以拔萃擢長安尉因進見武后召問刑政嘉之詢其族氏對曰廢后臣姑也左遷亳州司法叅軍神龍初爲河南丞武三思矯制貶臨川令宋璟荐授侍御史出爲許州長史歲旱開廩賑民卽自劾元宗赦之累遷工部侍郎而璿至中書舍人珣嘗爲秘書少監數年璿繼職終右散騎常侍卒贈戶部尚書諡曰孝子銅天寶中右補闕殿中侍御史

武甄字平一文水人潁川郡王載德子博學通春秋工文辭武后時隱嵩山中宗復位平一居母喪廼召爲起居

舍人景龍二年兼修文館直學士自請抑母黨上言夫
歲熒惑入羽林太白再經天太陽虧月犯大角臣聞災
不妄生上見下應信如景嚮詩曰唯此文王小心翼翼
昭事上帝聿懷多福陛下天性孝愛戚屬外家恩洽澤
濡臣一宗階三等家數侯朱輪華轂過許史梁鄧遠甚
恩崇者議積位厚者釁速故月滿必虧日中則移時不
再來榮難久藉昔永淳之後王室多難先聖從權故臣
家以宗子竊祿疏封今上聖復辟宜退守園廬乃再假
光寵爵封如初高班厚位遂超涯極故陰氣僭陽河洛
汎溢昔王族驕盈梅福上書竇氏專縱丁鴻進諫且后
妃之家恩過寵深一朝覆沒遂無噍類願思抑損之宜
長遠之策推遠之權以全親親慰勉不許遷考功員外

太原府志

卷三十六

文苑

五

郎時太平安樂公主各立黨相詆毀平一上書請悉召
近親貴人會宴內殿告以輯睦申以恩勤斥姦人塞讒
路上美其忠切卒不用初崔日用自言明左氏它日學
士大集日用折平一曰君文章固耐久若言經則敗績
矣平一乃請所疑日用曰魯三桓鄭七穆奈何答曰慶
父叔牙季友桓三子也孟孫至孫凡九世叔孫舒季孫
肥凡八世鄭穆公十一子子然及二子子孔三族亡子
羽不爲卿故稱七穆子罕子駟子良子國子游子卬子
豐也一座驚服平一問日用曰公言齊桓公楚莊王時
諸侯屬齊若楚凡幾平公靈王時諸侯屬晉楚凡幾晉
六卿齊楚執政幾何人日用謝曰吾不知君能知乎平
一條舉始末無畱語日用曰吾請北面闔坐大笑後設

宴兩儀殿歌言淺穢平一上書言大饗羣臣不容以倡
優媠狎虧汚朝典不納元宗初貶蘇州叅軍徙金壇令
既謫而名不衰開元末卒孫元衡儒衡

王翰字子羽晉陽人少豪健恃才及進士第張嘉貞爲長
史偉其人厚遇之張說至禮益加復舉直言極諫調昌
樂尉又舉超拔羣類說輔政召爲秘書正字擢通事舍
人駕部員外郎說罷出爲汝州長史徙仙州別駕日與
才士豪俠飲樂游畋伐鼓窮歡貶道州司馬卒

路敬淳并州人少好學盡孝居喪依廬三年尤明姓系以
譜學名家

王維字摩詰九歲知屬辭與弟縉齊名資孝友開元初擢
進士調大樂丞坐累爲濟州司倉叅軍張九齡擢右拾

太原府志

卷三十六

文苑

五

遺歷監察御史母喪毀幾不生累遷左補闕庫部吏部
郎中天寶末爲給事中及西狩維爲賊得以藥下利陽
瘖祿山迎置洛陽迫爲給事中時大宴凝碧池悉召梨
園諸工合樂賦詩悼痛云萬戶傷心生野烟百官何日
更朝天秋槐葉落空宮裏凝碧池頭奏管絃賊平下獄
或以詩聞行在縉請削官贖維罪肅宗亦自憐之下遷
太子中允久之遷中庶子中書舍人復拜給事中轉尙
書右丞縉爲蜀州刺史未還維自表已有五短縉五長
臣在省戶縉遠方願歸所任官放田里使縉得還京師
久乃召縉爲左散騎常侍上元初卒年六十一贈秘書
監維工草隸善畫名盛於開元天寶間寧薛諸王待若
師友寶應中代宗語縉曰朕嘗於諸王座聞維樂章今

傳幾何遣中人王承華往取縉裒集詩六卷文四卷上之

王之渙并州人兄之咸之賁皆有文名天寶間與王昌齡崔國輔鄭昉聯唱迭和名動一時

劉縱陽曲人陳許軍節度使昌裔子爲光祿主簿學於樊宗師士大夫多稱之

王墳太原人韓愈送墳序曰太原王墳示予所爲文好舉孟子之所道者與之言信悅孟子而屢贊其文辭

王彥威太原人少孤貧力學舉明經甲科淹識古今典禮求爲太常散吏卿知其經生補檢討官彥威采獲隋訖唐沿革禮條次彙分號元和新禮上之拜博士憲廟歲山陵事議用十二月下宿建言高祖中宗六月太宗四

太原府志

卷三十六

文苑

五

月睿代二宗皆五月德宗十月順宗七月惟元肅二宗皆十二月有爲爲之非常典也且卜歲暮則畢祔在明年正月是改元慶賜皆廢矣詔更用五月李夷簡言憲宗功高宜稱祖穆宗下其議彥威奏宜稱宗制可時祔主畢又還告太極殿彥威以爲不可執政怒坐視辭誤奪俸削階終不回屈後累擢司封郎中宏文館學士諫議大夫爲勘定淄青十二州兩稅使差糧纖悉人不爲煩還兼史館修撰興平民上官興殺人亡命吏囚其父興自首請罪議減死上言殺人者死百王共守原而不殺是教殺人有詔貸死彥威詣宰相據法爭下遷河南少尹俄改司農卿雅善李宗閔進拜平盧節度使開成初召爲戶部侍郎判度支嘗見文宗顯奏曰臣按見財

量入以爲出隨色占費終歲用之無毫釐差假令臣一
旦迷愚欲自欺沒亦不可得因上占雒圖又爲供軍圖
上之嘗奏復神策軍以廩縑於度支取直俄檢校禮部
尚書爲忠武節度使毀山房三千餘所盜無所容徙節
宣武封北海縣子性強敏善著書多行於時卒贈尚書
右僕射諡曰靖

溫岐字飛卿改名廷筠彥博裔孫少敏悟工爲辭章與李
商隱皆有名號溫李與貴胄裴誠令狐滈等狎數舉進
士不中第授方山尉徐商鎮襄陽署巡官不得志去歸
江東令狐綯方鎮淮南廷筠怨居中時不爲助力過府
不肯謁徐商執政頗右之欲白用會商罷楊收疾之遂
廢卒

太原府志

卷三十六

文苑

五

白行簡字知退太原人居易弟擢進士辟盧坦劔南東川
府入朝授左拾遺累遷主客員外郎判度支案進郎中
長慶時振武營田使智拔志歲終結課最詔閱實發其
妄寶歷二年卒

唐彥謙字茂業并州人咸通時舉進士十餘年不第乾符
末攜家避地漢南中和中王重榮鎮河中辟從事光啟
末貶漢中掾曹楊守亮鎮興元署判官累官至副使閬
壁絳三州刺史彥謙博學多藝文詞壯麗書畫音樂胥
出輩流號鹿門先生集三卷

溫憲庭筠子登進士第光啟中爲山南從事能世其詩學
王景太原人爲司門員外郎萊州刺史能詩

王武陵字晦伯太原人官尚書郎能詩嘗序宿慧山寺詩

曰視富貴如浮雲一歌一咏以紓情性

狄煥字子炎梁公仁傑之之後隱於南岳有詩名

王緒太原人僧辨裔孫讓永寧公輔梁書黜陳不列蕭穎士佐之著蕭梁史譜及梁不禪陳論以發緒義例

後五代

王景純太原人少客燕感家世儒者不當用材武進乃南遊嵩洛得譚用之爲友以文章相砥礪寢以文稱天會中還家至境上會北漢曆宗據太原嘆曰天下將定以區區一方拒天下兵此危國也遂止上黨潞州帥延致幕府後不復作吏時時購四方書鈔之晚年集書數千卷北漢亡入宋端拱中終於汴

宋

太原府志

卷三十六

文苑

書

陶穀字秀實太原人本姓唐祖彥謙有詩名父煥領夷州刺史唐季爲邠帥楊崇本所害因隨母柳氏育邠州之新平十餘歲能屬文起家校書郎單州軍事判官避晉祖諱改姓陶嘗以書干宰相李崧崧甚重其文時和凝亦爲相同奏爲著作佐郎集賢校理改監察御史分司西京遷虞部員外郎知制誥會晉祖廢翰林學士兼掌內外制詞目繁委穀言多委愜爲當時最天福八年賜緋袍靴笏黑銀帶九年加倉部郎中穀性急率嘗與充帥安審信集會杯酒相失爲審信所奏時方姑息武臣穀坐責授太常少卿嘗上言頃涖西臺每見臺司詳斷刑獄少有卽時決者至於閭閻夫婦小有爭訟淹滯踰時坊市死亡喪葬必俟臺司判狀奴婢病亡亦須檢驗

吏因緣爲奸而邀求不已經旬不獲埋瘞望申條約以革其弊從之俄拜中書舍人嘗請教習樂工停二舞郎及禁民伐桑棗爲薪並從其請開運三年賜金紫契丹北歸脅穀令從行穀逃匿僧舍中穀頗工歷數謂同輩曰西南五星連珠漢地當有王者出契丹主必不得歸國及耶律德光死有白光芒指北穀曰自此契丹自相魚肉矣遂歸漢爲給事中乾祐中令常叅官轉對穀上言曰五日上章曾非舊制百官叙對且異昌言徒浼天聰無益時政乞停轉對羣臣有所聞見卽許不時詣闕聞奏從之仕周爲右散騎常侍世宗卽位遷戶部侍郎從征太原爲翰林學士時命承旨以下撰爲君難爲臣不易論平邊策以進惟穀與竇儀楊昭儉王朴稱旨顯

太原府志

卷三十六 文苑

五

德三年遷兵部侍郎加承旨世宗畱心稼穡命工刻木爲耕夫織婦蠶女之狀置於禁中思廣勸課之道穀爲贊辭以進顯德六年加吏部侍郎宋初轉禮部尙書依前翰林承旨乾德二年判吏部銓兼知貢舉再爲南郊禮儀使法物制度多穀所定時鹵簿清游隊莫知甲騎具裝制以問穀穀上其制又大輦制久亡穀創意造之後承用焉明德門成詔爲記後累加刑部戶部二尙書開寶三年卒年六十八贈右僕射穀強記嗜學博通經史諸子佛老咸所總覽多蓄法書名畫善隸書爲人雋辨宏博而多忌好名云子邴起居舍人天禧四年錄穀孫實試秘書省校書郎

按宋史陶穀係邠州新平人今舊志皆言是太原人

未知孰是姑存之以俟博攷者

王貽孫字象賢溥子少隨周祖署商潁二州衙內都指揮使顯德中改朝散大夫著作佐郎宋初遷金部員外郎賜紫累遷右司郎中淳化中卒溥聚書萬餘卷貽孫遍覽之多藏法書名畫太祖嘗問趙普拜禮何以男子跪而婦人否普問禮官不能對貽孫曰古詩云長跪問故夫是婦人亦跪也唐武后朝夫人始拜而不跪普問所出對云太和中幽州從事張建章著渤海國記備言其事普大稱賞之端拱中右僕射李昉求都省百官集議舊儀貽孫具以對時論許其諳練云

楊寘字審賢晉人察弟也少有雋才慶歷二年舉進士京師試國子監禮部皆第一既試崇政殿上臨軒啟封見

太原府志

卷三十六

文苑

五

名喜動於色謂輔臣曰楊寘也遂擢第一公卿稱賀爲得人授將作監丞通判潁州未至官持母喪病羸卒特詔賻恤其家先是其友夢寘作龍首山人寘自謂龍首我四冠多士山人無祿位之稱我其終是乎已而果然狄遵度字元規棊子少穎悟篤志於學每讀書意有所得卽仰屋瞪視人呼之弗聞也以父任爲襄邑縣主簿居數月棄去好爲古文著春秋雜說多所發明嘗作擬皇太子冊文除侍御史制裴晉公傳人多稱之尤嗜杜甫詩嘗讚其集一夕夢見甫爲誦世所未見詩及覺僅記十餘字遵度足成之爲佳城篇後數月卒有集十二卷任山平晉人有志法春秋作通記擬井田作中田圖嘗應詔言事富弼厚遇之所著有晉溪集

邢鑑字叔明文水人少而篤學有經世濟物之心從晉谿任先生遊講習十年行修經明時方以詞賦取士鑑潛心經術因見詘於是講道山林不復以仕進爲意嘗與叅政歐陽修范仲淹學士石介爲知交卒年六十有七王詵字晉卿緘字工詩畫日從蘇軾游詩牋酬答無間尙主官至畱後

按明時滕用亨善鑒古嘗侍成祖觀畫卷未竟衆目爲趙伯駒用亨曰此王詵筆也至卷尾果然其爲後世推重如此

金

王璫字君玉太原人天眷二年進士弟珙字器玉珣字汝玉皇統九年同榜家世業醫有陰德聞里中嘗有金蠶

太原府志

卷三十六

文苑

七

金馬之瑞璫仕至汾陽軍節度使鄉人榮之號三桂王氏仲澤其從孫也金馬在部掾清卿房迄今寶之

劉滋字文榮合河人

卽興縣

六歲賦詩曰鶯花新物態日月

老天公

劉昂字子昂興州人

金於興縣置州

大定十九年進士曾高而下

以科名相踵者七世昂天資警言悟律賦自成一家輕便巧麗爲場屋捷法作詩得晚唐體尤工絕句徃徃贈炙人口初由省掾授平涼路轉運副使俄丁母憂爲當塗者所忌連蹇十年卜居洛陽有薦其才者泰和初自國子司業擢左司郎中會緣執政賈鉉事降上京畱守判官道卒

郝傑字子玉太原人正隆二年進士歷鳳翔府治中充遼

史刊修官仕至河東北路轉運使自號虛舟居士有集
行世張汝霖嘗奏曰郝傑能屬文宦業亦佳章宗謂宰
臣曰郝傑賦詩佳舊時劉迎能之李宴不及也子居簡
字仲寬有詩名太原平陽間居中字仲純樞密院令史
出身嘗刺坊州人物楚楚正大未除鳳翔治中南山安
撫使詩亦有名

倪民望字具瞻李屏山所謂倪侯頭如筆其鋒不可當者
也又張韶九成寄朔州荀輔臣云陳雷膠漆輕餘子楚
漢風雲屬少年李忠直卿賦雲云不將柳絮春風比好
作梨花月夜看至於蘇吉莘老李鵬翼冲霄與具瞻之
子仲儀詩文多可傳

李汾字長源太原人爲人尙氣跌宕不羈性褊躁觸之輒

太原府志

卷三十六

文苑

五

怒是以不爲人所容喜讀史工詩雄健有法避亂入關
京兆尹子容愛其才招致門下畱二年去之涇州謁左
丞張行信一見禮以上客元光間游大梁應舉不第用
薦爲史館書寫殊不自聊時趙秉文爲學士雷淵李獻
能皆在院刊修際汾在旁正襟危坐讀太史公左邱明
一篇或數百言音吐洪暢旁若無人旣畢顧四座漫爲
一語云看秉筆諸人積不平而雷李尤切齒乃以嫚罵
官長罷去明年上書言事不合客唐鄧間恒山公武仙
署行尙書省講議官旣而仙與叅政完顏思烈相異同
頗謀自安懼汾言論欲除之汾覺遁泌陽仙令總帥王
德追獲之絕食而卒年未四十平生詩甚多不自收拾
傳者十二三而已

王渥字仲澤後以字行太原人性敏俊不羈博學善談論
工尺牘字畫清美有晉人風少游太學長於詞賦登興
定二年進士第爲時帥奧屯邦獻完顏料烈所知故多
在兵間後辟寧陵令有治蹟入爲尙書省令史使宋至
揚州應對敏給宋人重之還爲太學助教轉樞密院經
歷官俄遷右司都事稍見信用及內族思烈行省事於
鄧州以渥爲左右司員外郎從行思烈入援自汝州過
密縣遇元兵武仙欲阻澗思烈不聽渥勸曰武仙大小
數百戰經涉不爲不多兵事當共議思烈疑其與仙有
謀幾斬之渥自以爲無愧於內不懼也已而思烈果敗
渥歿於陣中仲澤博通經史有文采善談論工書法詩
其專門之學人物楚楚若素宦於朝吏事則與冀京父

太原府志

卷三十六

文苑

五

相上下其辨博又屏山所許天下談士三人之一也

常添壽太原人四歲能作詩時與易州麻九疇俱稱神童
元

同恕字寬甫其先太原人五世祖僑奉元祖昇父繼先博
學能文廉希憲辟掌庫鑰家世業儒同居二百口無間
言恕羈卯如成人日記數千言年十三以書經魁鄉校
至元間貢禮曹辭不行仁宗初拜國子司業儒林郎三
召不起陝西行臺侍御史趙世延請卽奉元置魯齋書
院中書奏恕領教事制可之來學者千數延祐時再主
鄉試人服其公六年以奉議大夫太子左贊善召入見
東宮賜酒慰問因獻書歷陳古誼英宗初以疾歸致和
元年拜集賢侍讀學士以老疾辭恕之學由程朱上溯

孔孟教人曲爲開導性整潔平居雖大暑不去冠帶事異母如所生父喪哀毀致目疾家無儋石儲而聚書數萬卷扁所居曰渠菴時蕭鄰居南山下入城府必主恕家士論稱曰蕭同恕家居十三年鄉里稱先生而不姓至順二年卒年七十八贈翰林直學士封京兆郡侯諡文貞著渠菴集二十卷

張欽榆次人登進士第歷太原路儒學教授博洽善屬文有韓柳風士類多宗慕之

郝忠恕交城人佑之子翰林待制獻所著無逸圖帝悅命總裁宋遼金三史書成告歸終身不出

王守誠字君實陽曲人氣宇和粹性好學從鄧文原虞集游文辭日進泰定元年試禮部第一授秘書郎遷太常

太原府志

卷三十六

文苑

六

博士續編太常集禮若干卷轉藝林庫使與著經世大典拜陝西行臺監察御史除奎章閣鑒書博士拜監察御史僉山東廉訪司事改戶部員外郎中書右司郎中拜禮部尙書與修遼金宋三史書成擢叅議中書省事調燕南廉訪使至正五年除河南行省叅知政事奏差憲使籍廉訪使家銅梁縣尹張文德捕殺賊百餘人重慶府官以私怨使縣吏誣之擬杖一百爲直其事辨析贓訟多所平反釐正職田因疏言仕於蜀者地僻路遙俸給薄何以自養請以戶絕及屯田荒者召人耕種收其入以增祿秩宜賓縣尹楊濟亨欲於蟠龍山建憲宗神御殿儒學提舉謝晉賢請復文翁石室爲書院皆采以上聞成之風采聳動居諸道最進資政大夫河南行

省左丞未上母喪遘疾至正九年卒年五十四賜鈔萬緡諡文昭有文集若干卷

郭恭元貞間登進士第善用帛爲大書飛動有神今大成殿東羅漢堂扁皆其遺筆

聶天章交城人至元間舉進士第善文辭有修行授朝列大夫後左遷趙城令因辭歸不出

第五居仁太原人器量宏遠經明行修而力農自給教授生徒凡數百人卒後門人私諡曰靜安先生

省志作周居仁誤

胡巨源榆次人登進士第任高麗軍民總管儒學教授博學多著述蔚有文稱子惟堯領鄉貢仕晉寧路學正寬裕不事邊幅士子樂與之游博雅出巨源右

杜質榆次人性嚴重博學有雅量一吟一詠胥包括道義太原府志

卷三十六

文苑

空

激勸風化士林雅重之歷翰林院編修江北燕南兩道廉訪司經歷江南諸道監察御史

程邦彥祁縣人工詩賦善草隸時稱三絕歷官汾州同知明

楊一奇交城人嘉靖癸未進士河南嵩縣知縣執法除暴吏畏民懷陞陝西鄜州知州未赴著有太極圖說畧義學史談易經四書讀書錄補讀書紀覽自笑錄體物韻語行於世

閻樸字文甫榆次人教諭大綸子嘉靖壬辰進士改庶吉士李文康極器重之授檢討晉左贊善告歸值敵犯邑城與有司協力固守起補原官兼署司經局印陝西守臣請復河套下九卿會議樸亢聲曰謀事貴有成算今

海內困敝兵食兩虛深入窮荒倘有蹉跌爲害匪細議
上得允遷南京國子監祭酒進六館諸生嚴試之如鎖
闈例且曰儒者立志當以聖賢爲準聖賢一誠其本五
倫其實六德六行六藝其目也閱五旬忽有旨以赴任
違限勒令閒住歸築小園結茅屋數椽列琴尊圖史其
中優游以終老所著有通鑑逸旨榆次志山西通志稿
王道行字明甫陽曲人嘉靖庚戌進士初授鄧州知州遷
大名同知轉蘇州知府正直廉介所至吏畏民懷尋陞
應天副使陝西叅政再陞河南按察使四川布政使以
耿介忤當路歸杜門著書有桂子園集

朱表杪字竹溪陽曲榮靖王曾孫醇謹好讀書曰取秦漢
典籍朝夕雜誦間爲詩賦喜臨池尤善草書宗二王法
太原府志
卷三十六
文苑
奎
子知鰲束髮習聲律年甫壯學成嘗遊玉柱峰貌姑射
山所至多佳句士大夫稱之

徐行岢嵐州人性強記爲文千言立就志行敦篤善教人
治戴禮者胥出其門隱居草野讀書自娛年八十餘手
不釋卷子瑤永平教授珮無錫丞咸有父風

李重熙岢嵐州人家貧不能給餽粥棲西山寺不爐不扇
足迹不入城市有句云聖賢渡口休行錯義利關頭要
認真蓋自况也

王繼臣岢嵐人宗陽明甘泉之學議論多出人意表穆侍
御按臨諸生迎道左繼臣獨隱樹後穆呼而責之繼臣
曰方今大同兵變邊鄙多虞非天下無事時也明公不
詢及一言乃屑屑與書生較短長邪穆默然督學廖較

士至州講不貳過章繼臣曰紫陽註亦有誤處今云過於前者不復於後是矣乃註仁則曰顏子不能不違於三月之後豈非自相矛盾乎廖文宗避之及卒貧不能舉喪友人慕其義醵金葬焉

國朝

李中馥字鳳石太原人天啟舉人性剛鯁進退不苟爲孝廉五十年未嘗一入公府直指使者薦辭不赴優游泉石間甲申闖寇遣人授僞官怒曰乃公向不趨名今寧爲賊屈耶閉門臥不起比姜逆亂登陴畫守禦方畧縣令恃以無恐雅嗜讀書晚年益勤朝夕不釋卷所著有從好集石鼓考本草目錄銀杏園文集

侯璋字樸庵陽曲人康熙丁未進士官內閣中書少穎異

太原府志

卷三十六

文苑

奎

有經濟學熟肄禮樂兵農錢穀鹽鐵諸務及改試策論指陳利害殊悉戊午典湖廣鄉試手諸生卷殫神簡閱夜漏數十下不少倦榜發日卒

閻若璩字百詩太原人少奇慧博極羣書而句字必精核不少苟尤嗜吟詩類張籍王建山左趙執信嘗謂山陽閻百詩學問博洽前無古人其見重於時如此康熙戊午舉博學宏詞卒若璩僑居淮安故稱山陽閻百詩云所著四書釋地名六卷辨証經史疑義四卷困學紀聞註証三十卷孟子生卒歲月考一卷子詠進士官中書舍人亦以文名

張志遠字鵬期陽曲人品行端潔爲諸生博學工制藝善詩詞旁通醫學而楷書尤精得黃庭遺法督學高龍光

稱其整密勁雅可配文待詔晚年學益勤聚羣書手自
評雋著詩詞稿三卷詩叶正韻一卷切音要訣一卷醫
學抄要八卷

王介石字豫二榆次人少喜讀書比壯益究經史旁及釋
老之學皆有論說傳山見而悅之贈詩定交爲平遙司
訓以古文教諸生士多嚮之遷廣昌司諭升河南桐柏
令未之任而卒

張聖大字庸爾興縣人性至孝年十四補弟子員壬申舉
於鄉博極羣書教授生徒多所成就

高若岐字天柱太原人恩貢生肆力經史百家爲文章詩
詞討論精核以真切爲主雍正間修邑志旣而儲大文
應晉撫聘修通志聞岐名以書招與同事見其著作輒

太原府志

卷三十六

文苑

六

贊賞之其書法宗傅山有名於世

雷仁育字萬有太原人乾隆丁巳進士除宣平令政尙寬
簡兩充同考官所拔皆知名士歸田後學益精教授生
徒恒數十百人

蔣岐鳳字鳴瑞陽曲人乾隆己卯舉人性至孝家貧授徒
以供繼母好讀書寒暑不輟以文名於時

會璜陽曲縣歲貢父沒家貧窘繼母殷矢以死殉父璜長
跪哀慰每食親供母寢猶侍立窓外無冬夏者屢年繼
母有女適同邑張隨嘉嘉外出四十餘年無音信子女
皆無養璜撫字聘嫁皆不失所迄今女得全節載入志
性好學辛勤無間文藝真切教育人材成就者甚衆遠
近咸佩服

